



Wantok



Namba 1895 Wan Wik Disemba 9 - 15, 2010

Niuspepa Bilong Yumi Ol PNG Stret! **K1 tasol**

Husat bai PM long 2012?

Pes 3

Meri ogenaism helpim ol yut

Pes 11

Betde bilong Empera Akihito na Nesenel De bilong Japan...

Pes 18

PNG em "Kristen kantri" tru o nogat? ...asua stap long Konstitusen

JAMES KILA i raitim

BIKPELA asua i stap pinis long Konstitusen o Mama Lo bilong Papua Niugini we i opim dua long kain kain rilijen o lotu long kam insait long kantri na nogat samting bai stopim ol.

Wanem man o meri i ken statim lotu bilong em yet long PNG, na Konstitusen (Mama Lo) i no inap stopim em.

Biknem loya na Songan bilong Luteran Sios, Kelly Naru i tokaut long dispela las wik long greduesien bilong Sinia John Flierl Luteran Semineri Pasto

greduesin long Lugaweng long Finschafen, Morobe provins.

Songan Naru i tok planti lain save tok olsem Papua Niugini em Kristen kantri, tasol Konstitusen bilong PNG i popaia long strongim dispela het-tok.

Em i tok olsem het-tok bilong Papua Niugini Kon-

stitusen i tok olsem Papua Niugini em i Kristen kantri na yumi kisim ol dispela Kristen Prinsipals o ol pasin na toktok we bai yumi holim strong na givim i go ol pikinini na tumbuna i kam bihain.

"Tasol Konstitusen o Mama Lo bilong yumi tru tru long Seksen 45 i no tok

olsem Papua Niugini em wanpela Kristen kantri,

"Konstitusen i tok olsem ol manmeri bilong Papua Niugini i gat fridom long prektisim o karimaut pasin bilong rilijen o lotu," Mista Naru i tokaut .

"Long lukluk o skelim bilong mi, toktok bilong Seksin 45 i no poromanim o slip gut wantaim as tingting na het-tok bilong Mama bilong Papua Niugini olsem Kristen Kantri.

Em i tok dispela i min olsem Konstitusen i no stopim ol narapela lotu, na dispeal em wanpela asua i stap long Konstitusen o Mama Lo bilong Papua Niugini.

Mista Naru i tokim ol nupela lain Luteran pasto olsem bikos Konstitusen i tok olsem pipel i gat fait long fridom bilong rilijen o lotu. Rilijen o mining bilong wanem lotu em i no tok klia stret rilijen i min Hindu, Islam, Buddism o tumbuna bilip. Olsem na hevi o salens em olsem Konstitusen o Mama Lo i opim rot long kain kain rilijen long kam insait.

I go moa long pes 2...

RUREL ROT BAGARAP YET. Planti ol rurel rot insait long PNG i stap bagarap yet na planti manmeri i no kisim gutpela sevis bilong gavman o bisnis long helpim sindaun bilong ol long ples. Hia em wanpela gutpela piksa long rot bilong Afore insait long Oro provins. Maski olsem gavman i bin putim K686.3 milien insait long 2010 Nesenel Baset long karimaut wok mentenens, planti eria i no lukim wok i kamap na planti rot i stap bagarap yet olsem bipo.



Teksim Fevret Sta blo yu!

Lukim EMTV displa Sunde long 6:30pm nait. Teksim nem lo sta yu laikim i go lo namba1699 na bai yu go insait lo laki dro we yu inap winim kes moni na fri kredit!

Digicel stars



Digicel tems na kondisen istap insait



OCEAN BLUE TUNA

Gutpela abus tru na i no dia tumas!



Noken mekim ol bikpela kaikai selebresen

...Moa long 3,000 pipel long siti bin kisim sik kolera

Veronica Hatutasi i raitim

ASKIM i go long pablik long Nesenel Kapitel Distrik (NCD) long lukautim ol yet gut long helt na sefti bilong ol bikos planti woklain long haus sik na ol klinik insait long siti bai go long Krismas malolo bilong ol.

Biknem dokta husat i lukautim sik kolera long NCD, Dokta Timothy Pyakalya, i wokim dispela toktok long wanem, sik kolera i stap yet long siti. Na sapos pipel i no wokim samting stret long i no bihainim gutpela haijin na kisim ol kaikai ol i no redim long gutpela rot, bai ol i bagarap.

I kam inap nau, mak bilong pipel insait long siti i go daun, tasol Pot Mosbi Jenerel haus sik i wok long kisim liklik lain sik manmeri long kolera.

"Haus sik i wok long kisim tupela na tripela sik kolera lain na givim ol marasin. Ol i kam long ol setelmen eria olsem 8 na 9 Mail na ol arapela hap moa long siti. Long Koki na Hanuabada, mak i go daun. i kam inap nau, haus sik i lukim 10-pela sik kolera lain," Dokta Pyakalya i tok.

Em i tok long mun Septemba, sik i bin kisim planti lain long ples Lealea ausait long Mosbi siti bihain wanpela selebresen long skul.

Dokta Pyakalya i tok sapos pipel i no lukaut na wokim wanpela rong, sik bai kamap gen bikos binatang bilong em i stap yet long

graun na wara.

Em i tok bikpela samting em long bihainim besik haijin long wasim gut han bipo long kaikai, bihain long yusim toilet na taim yu laik redim kaikai. Tu yusim gutpela klinpela wara, boilim wara long dring, noken larim ol lang i holim ol kaikai bikos ol i karim binatang bilong pekpek, na noken pekpek nabaut.

Dokta Pyakalya i tok wanpela bikpela samting em nogat gutpela wara na toilet insait long ol setelmen eria na olsem, sik kolera na ol narapela sik i stap yet. Na em i wok bilong tupela atoriti olsem Eda Ranu na NCDC long mekim samting long dispela.

"Hevi long siti nau em long nogat gutpela wara na toilet long mak bilong 150 setelmen i stap nau long Mosbi siti.

"Em i wok bilong Eda Ranu na NCDC long stretim sait bilong wara long ol setelmen eria. Mipela ol helt woklain i mekim samting long daunim sik.

"Pipel yet i mas lukautim ol yet long kain kaikai ol i kisim na wara bikos binatang bilong sik kolera i stap long ol wantaim tu lang," Dokta Pyakalya i tok.

Stat yet long mun Epril taim sik kolera i bin kamap long Mosbi, 5-pela pipel i bin dai na moa long 3,000 pipel i bin slip na kisim tritmen long haus sik bikos ol bin bagarap tru. Long ol dispela i dai, tripela i bin dai long ples na tupela long Gerehu Haus sik bikos ol i bin

gat ol narapela sik antap long kolera.

Em i tok NCD i no bin bagarap tumas long daunim sik bikos ol i gat ol nes i bin kisim trening long lukautim ol manmeri na pikinini i kisim sik kolera, inap IVF wara na moa sapos i kam long Wol

Helt Ogenaisesen, AusAID na nesene gavman.

Tasol long dispela taim Krismas i kam klostu na pipel bai selebret, i moabeta long lukaut gut na noken selebret na mekim ol bikpela bung kaikai

Moa saveman bilong PNG i kamap

YIA 2010 i pinis wantaim planti gutpela samting.

Long sait bilong kamapim ol saveman kantri i lukim narapela 115 manmeri i pinis wantaim teknikal trening.

Ol dispela manmeri i pinis dispela skul long Pot Mosbi Tenkinal Kolis long Idubada Teknikal Kolis long Pot Mosbi long las wik.

Dispela kolis nau i stap aninint long Australia gavman na nau ol i kolim kolis wantaim nem Australia-Pasifik Teknikal Kolis (APTC).

"Em i gutpela wei long pinisim yia.

"Wantaim bikpela laik i stap long ol saveman long sait bilong teknikal we planti wok long maining, wel na ges sekta kamapim kain savemanmeri i bikpela samting," AusAID long PNG, Stephanie Copus-Campbell i tok long greduesen.

Dispela i min ol i redi tasol long go insait long ol kampani na wok na strongim ikonomi bilong kantri.

Em i tok stat long taim kolis i op long 2007, APTC i trenim moa long 600 sumatin we dispela i lukim 382 i pinisim skul long automotive, konstraksen, ilektrikal na manufeksaring tred na 212 turisim na hospitaliti.

"Dispela em ol hap we i gat bikpela sot long kisim kain savemanmeri na wok long wel na ges sekta.

Em i tok wantaim kamap bilong ol bikpela projek, PNG i sot long painim kain savemanmeri na olsem em i gutpela em mas trenim moa kain savemanmeri.

Namel long ol lain husat i greduet em Labidi Labadio, wanpela bilda long Gilig-

ili long Alotau, Milen Be.

"Mi mas tok olsem mi kisim gutpela save nau bihain long mi kisim dispela skul.

"Mi lainim planti samting.

"Wanpela samting em mi save long nupela standet bilong putim ruf," Labadio i tok.

Narapela greduet, Kathleen Pidik i kisim skul long hospitaliti na menesmen long Kokopo Viles Resot.

"Mi lukim olgeta skul long APTC olsem blessing. Em i no long wanem samting mipela i bin kisim skul long em tasol long olgeta samting i pas wantaim long dispela skul," Kathleen i tok.

APTC i givim sapos long Mosbi Teknikal Kolis, olsem em i ken helpim long bungim namba bilong ol teknikal wokman em planti ol sekta i laikim long dispela taim.

APTC i saplaim nupela ol samting long kolis, long sait bilong edministresen na save long wok bisnis na i kisim tupela POMTEK tisa na trenim ol long 12-pela mun long save bilong givim skul.

"Em i putim POMTEK long wanpela strongpela mak olsem em i ken trenim strongpela wokmanmeri long bihain taim.

"Wantaim dispela inap olsem 420 PNG sumatin i stadi long ol arapela hap bilong Pasifik aninit long APTC na i askim long moa sumatin long go join long 2011," Mis Copus-Campbell.

Kolis i helpim tu long daunim pasin bilong PNG we i lukdaun long ol meri na i laik givim moa sapos long ol meri long go long skul.

PNG em "Kristen kantri" tru o nogat?

i kam long pes 1

Dispela i min tu olsem wanem man o meri husat i laik statim lotu o muvmen bilong em, bai Mama Lo o Konstitusen i no inap long stopim em.

Gutpela piksa o eksampel em Blek Jisas long Madang.

Mista Naru i tok olsem sapos Blek Jisas i no brukim lo bilong kantri long bagarapim ol meri, wanem samting bai stopim em long karimaut wok o pasin long mekim lotu bilong em. As bilong dispeal em olsem

em i no brukim lo insait long Konstitusen. Na sapos em i go het long wokim kamap Sios bilong em, dispela lain bilong em i ken go bikpela.

Mista Naru i tok olsem Seksen 45 bilong Konstitusen i givim rait long ol man long prektisim o karimaut wok bilong kain kain rilijen o pasin bilong lotu. Na Kristen rilijen em wanpela bilong ol dispela olsem na yumi noken tok olsem PNG em Kristen kantri bikos PNG Konsti-

tusen i opim dua long kain kain narapela rilijen long kirapim pasin lotu o narapela lain long kam insait long kantri.

Songan Naru i tok strong olsem salens nau i stap long ol lida, politisen o lain bilong mekim ol lo na polisi lukluk i go insait long dispela asua na go bek na skelim gut dispeal lo na kamapim pablik dibeit o toktok i go kam long senisim dispela Seksen 45 long Mama Lo bilong Papua Niugini.

OXFORD, TOK PISIN INGLIS DIKSENERI

Katim, na pulimapim oda fom daunbilo na salim i kam long Wantok Niuspepa sapos yu laik baim dispela Oxford Papua Niugini Dikseneri (Dictionary) we Wantok na Oxford i wok bung wantaim long kamapim. Dispela buk i ken helpim yu tanim Tok Pisin i go long Inglis, o Inglis i go long Tok Pisin. Hariap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

| TITLE | ISBN | PRICE (inc GST) | QTY | SUBTOTAL |
|----------------------------------|---------------|-----------------|-----|----------|
| PNG Tok Pisin English Dictionary | 9780195551129 | K38.50 | | |

| | | |
|--|-------------|---|
| Estimated total (your correct at the time of printing and is subject to change without notice) | TOTAL | K |
| | POSTAGE | K |
| | GRAND TOTAL | K |

- Options for Payment
- 1) Direct deposit into bank account (details below)
 - 2) Mail Cheque to Word Publishing Company Ltd, PO Box 1192, (440)01, APLI
 - 3) Call into the office: Office 02, Section 18, Alifanani, OI, Wagaaga, BCC

Account Name: Word Publishing Company Ltd
 Account Number: 100 000 5380
 Bank: Bank of South Pacific Ltd
 Branch: Commercial Centre
 Branch Code: 8951
 Swift Code: BOSPFGM

FAX BACK TO : (675) 325 2579

Phone: (675) 325 2500
 Fax: (675) 325 2579
 Email: word@wantok.com.pg

Name (print): _____ Phone: _____
 Address (print): _____

 Email: _____ Signature: _____

Husat bai PM long 2012?

... Somare redim pikinini bilong em

Paul Zuvani i raitim

PAPUA Niugini inap lukim nupela praim minista long 2012.

Dispela bai stap long Memba bilong Angoram na Minista bilong Pablik Entapraisas Honorabel Arthur Somare.

Aninit long Nesanel Alaiens (NA) lo wanpela man i no inap lidaman long dispela pati long tupela taim.

Se Michael i stap lidaman long 2002 na 2007 ileksen. Em bai pinis long 2012.

Tasol maski long dispela, em yet i tok em bai pinis long dispela taim.

Tasol ol man insait long NA i tok Se Michael bai i no inap pinis.

Dispela em long wanem: long lukim Arthur i go pas long NA.

Ol insait man i tok dispela ol toktok i kamap klia long ol toktok bilong Se Michael taim em i givim toktok long Maining na Petroleum kibung long Sidni Australia long Mande dispela wik na las wik Trinde long Veifa'a viles, Mekeo, Sentral Provins.

Ol i tok bikos long gutpela

bihainim i stap long politik bilong Se Michael, ol manmeri bai laik votim NA kendidet long 2012 sapos Se Michael i stap yet long politik.

Na taim dispela i kamap i gat bilip NA bai winim planti sia long 2012 Jeneral Ilekseen.

Taim dispela i kamap na bihainim Oganik Lo long Integriti bilong Politikol Pati Na Kendidet (OLIPPAC) NA i mas kamapim nupela gavman.

Taim dispela i kamap ileksen long lidasip bilong NA bai kamap tu.

Long dispela taim Arthur bai kisim ples bilong Se Michael na kamapim nupela gavman.

Ol askim olsem bilong wanem Arthur bai kamap lidaman taim ol arapela lidaman bilong NA long foapela rijen i stap yet?

Long dispela askim ol man long pati i tok dispela i tru tasol sapos wanpela i lukluk gut long lidasip long dispela level, em i brukdaun.

Dispela em long wanem sampela lidaman yet i pinis long pati na sampela em Se Michael bai rausim.

Long Momase rijen Patrick Pruaitch i sanap long sait bihain long Lidasip Traibunel i mekim wok painim long em long asua Ombudsmen Komisen i tingting Prauitch i mekim.

Long Sauten rijen Se Puka Temu yet i lusim NA na i stap long Oposisen.

Long Hailans, Se Michael i rausim Don Polye olsem Deputi Praim Minista na givim long Memba bilong Wabag Sam Abal.

Dispela i min Polye i nogat moa gat luksave bilong Se Michael olsem lidaman bilong NA long Hailans rijen.

Long Niugini Ailans ol toktok i kamap olsem taim Paul Tiensten i kamap olsem ekt-ing Gavana Jeneral Se Michael bai rausim em long ministri bilong em na givim long narapela man.

Wankain olsem senis long Polye kain senis bai tokaut klia olsem Se Michael i nogat luksave moa long lidasip bilong Tiensten.

Kain ol senis bai stap taim NA i go insait long 2012 ileksen.

Dispela bai lusim Arthur wanpela tasol i strongpela

NA kendidet na dispela bai mekim em i isi long kamap lidaman bilong pati.

Sapos olgeta samting i kamap gut long NA long 2012 Arthur bai kamap praim minista.

Ol insait man i tok olgeta tingting i klia long toktok bilong em long Maining na Petroleum kibung long dispela wik Mande Se Michael i tok: "Taim mi lusim opis bihain long tupela taim, mipela bai gat nupela ol lidaman husat i gat save long kisim dispela kantri i go moa yet."

"Aninit long lidasip bilong mi ol i kamapim kaikai bilong LNG projek.

"Ol i toktok strong long kamapim Benefit Searing Agrimen (BSA) mani bilong ol papagraun.

"Ol i toktok moa long ol Arapela Profit Takis long taim prais bilong wel i go antap moa we ol papagraun na ol manmeri bilong Papua Niugini bai kisim win mani long em.

Na long Veifa'a Se Michael i tok: "Ol manmeri bai yupela i lukim nupela lidasip long 2012."

Pagelio tok lukaut long paitim pikinini

TOK lukaut i go aut long ol lain husat i laik bringim bek gen "corporal punishment" o pasin long paitim ol mangi i bikhet long taim bilong skul, bikos dispela i ken kamapim hevi long Edukesen, Kriminel Koud na Lukautim Pikinini Ekt.

Ektong Edukesen Sekreteri, Dokta Joseph Pagelio, i wokim dispela tok lukaut bihainim ol memba bilong Madang Eben Yut Kaunsel (MUYC) i wokim strongpela toktok olsem stat long mun Februari neks yia, ol bai paitim ol sumatin sapos ol i painim ol ausait long skul grauno raun nating long strit bihain long skul.

Dokta Pagelio i mekim tok lukaut long ol MUYC memba olsem ol i mas glasim gut ol samting pastaim bipo ol i go het wantaim tingting bilong ol long kisim "corporal" panisemen i kam bek long ol sumatin bikos nau, ol skul i stopim dispela kain mekimsave long ol sumatin husat i brukim ol skul lo.

Dokta Pagelio i tok long nau, skul bot tasol i gat rait long panisim o givim mekim save i go long ol sumatin husat i brukim ol skul lo. Na kain mekimsave ol i save givim em long saspedim ol i lusim skul long sampela taim, pinisim ol long skul olgeta o mekim wok.

Em i tok nogat narapela man ausait long skul bot i ken givim mekim save long ol sumatin i bikhet long skul.

Dokta Pagelio i tok ol lo we ol bai brukim sapos ol i kisim bek "corporal" panisemen em long Edukesen Ekt 1983 (Education Act 1983), Kriminal Koud (Criminal Code) na Lukautim Pikinini Act.

Em i tok sampela skul long kantri, olsem Madang, i nogat Provinsel Edukesen Ekt na ol bai brukim dispela Edukesen Ekt 1983.

Dokta pagelio i tok Palamen i bin kamapim nupela lo long 2001 bilong lukautim ol pikinini. Dispela em long "Criminal Code Act" we i mekim klia olsem pikinini em lain i gat 16 na daunbilo kismas. Na Lukautim Pikinini Ekt 2007 i tok pikinini i lain kismas bilong em i aninit long 18 yia. Tasol em i tok planti pikinini long praimerina sekonderi skul level em kismas bilong ol i stap namel long 6 na 18 yia.

Dokta Pagelio i tok i moabeta long ol MUYC memba long bung na toktok wantiam ol Madang Edukesen Divisen otoriti, ol skul bot na ol papamama long toktok long ol sosel hevi olsem ol drag, alkohol na ol narapela hevi olsem we sampela sumatin i save go insait long en.

Planti rurel rot long PNG bagarap yet

James Kila i raitim

PLANTI ol rurel rot insait long Papua Niugini i stap bagarap yet na planti manmeri i no kisim gutpela sevis bilong gavman o bisnis long helpim sindaun bilong ol long ples.

Maski olsem gavman i bin putim K686.3 milien insait long 2010 Nesanel Baset long karimaut wok meintenens, planti eria i no lukim wok i kamap na planti rot i stap bagarap yet olsem bipo.

Wanpela lida bilong Managalas Pipols Faundesen, Malkas Kajia, i tok planti toktok na wok i kamap

long bikpela taun olsem Mosbi tasol, na nogat wok i kamap long ol rurel rot we planti pipel i nidim tru long kisim helt sevis olsem marasin bilong helt senta na klinik long ples.

Ol manmeri long rurel ples i wok long wokabaut yet karim kago na kalapim bikpela maunten, wara na baret long painim sevis long helpim sindaun bilong ol. Ol i hatwok long traime baim sop, karasin, masis, sol na ol stua samting long taun.

Tasol gavman i wok long toktok tasol na i no go daun tru long helpim turangu ol

manmeri bilong ples.

Wantok Niuspepa i bin raun i go long Managalas long Afore lokal level gavman (LLG) long Oro provins na i lukim olsem sampela seksen bilong rot i bagarap yet na turangu ol pipel i save wokabaut longwe tru na karim ol samting bilong ol i go salim.

Deputi Oposisen lida na mausman bilong oposisen long Fainens, Bart Philemon i tokaut olsem trenspot netwok o ol rurel rot long kantri i stap bagarap yet.

Gavman i bin putim K686.3 milien long 2010 Nesanel Baset long karimaut wok

long stretim ol rot na bris na trenspot netwok long kantri.

Tasol Nesanel Trenspot Developmen Plen i skelim olsem K1 bilien i mas stap olgeta yia long stretim ol trenspot netwok insait long PNG.

Mista Philemon i tok planti ol rot, bris, wof na liklik balus insait long kantri i stap pas yet bikos nogat wok i kamap long ol.

Gavman i toktok nating long Haus Palamen olsem em bai wokim samting stret, tasol nogat wok i kamap na ol manmeri long rurel eria i stap bagarap yet.



KIKSTATIM DEI WANTAIM

Okapa MP Oveyara opim Ketu bris

Sape Metta i raitim

OL lokol ples na hauslain manmeri na ol woklain bilong ol gavman ejensi long Keiyagana, Kanite, Saut na Not Fore na Gimi long rurel na rimot Okapa distrik, Isten Hailans, bai ken pilim isi nau long raun i go i kam long wokim ol maket na ol arapela bisnis bilong ol long Okapa stesin na Goroka taun bihain long Ketu bris em Okapa MP Bonny Oveyara i bin kamap na opim long Fonde wik i go pinis.

Dispela bris i wok long bruk nabaut na i save givim planti hevi long ol lain long dispela faivpela eria. Mekim olsem na Oveyara i luksave long dispela na bihain long em i singautim na i sindaun na paitim toktok wantaim ol lain long dispela distrik edministresin na ol lain long Joint Distrik Baset Praioriti Komiti (JDBPC) ol i wanbel na kamap wantaim tingting bilong apgredim dispela Ketu bris.

Bikpela astingting bilong dispela bris apgreding em

long helpim ol lokel mama, ol fama na ol manmeri tu long ol i ken yusim long muvim ol fres gaden kaikai, ol kopi na ol arapela fam samting i go long Goroka taun long salim na skelim tu long kisim liklik mani long helpim ol yet. Na tu ol arapela bikpela gavman sevis olsem helt, skul na ol arapela sevis em ol gavman ejensi na ol sios i ken bringim i go long en, bai i ken ron gut nau long wanem bris em i kamap gut na dispela ol sevis bai ken ron i go het gut long dispela ol eria.

“Mipela i luksave long bagarap bilong dispela bris na tu ol hevi em ol mama, ol fama, gavman ejensi, sios na ol manmeri i save bungim long taim ol i laik karim ol gaden kaikai, kopi na ol arapela sevis i go i kam long taun. Olsem na mipela i mas stretim na apgredim dispela bris long helpim na sevim dispela ol lokel pipel na long husat bai i ken bringim ol gutpela sevis i go insait long dispela eria long Okapa distrik,” Oveyara i tok.

Em i tok mani bilong ap-

greding bilong dispela bris em i kam yet long Distrik Sevis Impruvmen Program (DSIP) bilong Okapa na Distrik Rot Impruvmen Program (DRIP) bilong Isten Hailans provinsel gavman.

Oveyara i tok dispela bris em samting we nesenel na provinsel gavman na Okapa distrik edministresin i wokbung long bildim na apgredim, bai olgeta lain manmeri i mas kisim onasip long dispela bris na lukautim gut, long wanem em i wanpela bikpela samting we gavman long olgeta level i bung wantaim long bringim dispela sevis i go long olgeta lain long dispela eria.

Em i go moa na i tok Okapa bai ken senis na kamap olsem wanpela model distrik long Isten Hailans na PNG tu sapos em i kamapim planti ol infrastraksa developmen long distrik.

Oveyara i tok bihainim apgreding bilong dispela bris long Ketu, wok bai stat nau long apgredim tupela moa bris long dispela sem eria em long Ororapi na Henagaru stesin.



BRINGIM BEK: Mausman bilong UNICEF long Goroka, David Glama (raithan), i sanap wantaim ol Skaut na Gel Gaid lida bihain long greduesen long Goroka – Isten Hailans long Fraide long wik i go pinis. Foto: Sape Metta

Gel Gaid na Skaut i kam bek long Goroka

Sape Metta i raitim

WANPELA taim long Goroka taun long Isten Hailans Provins, wok bilong gel gaid (girl guides) braunis (brownies) na Skaut (Scout) em ol i bin wok na ron gut tru.

Na long dispela taim tu bikpela laik o intares em i bin stap long joinim na stap insait long Braunis, Gel gaid na Skaut.

Tasol dispela intares em i bin dai aut long sampela yia i go pinis long 1980's na i kam antap.

Na klostu em i dai aut na pinis olgeta, tasol UNICEF i kam insait wantaim halivim na sapot na kirapim bek operesen bilong ol Skaut, Gel Gaid na Braunis.

UNICEF Kodineta bilong Goroka zon, David Glama i tok amamas olsem ogenaisesen bilong em i luksave long nid bilong ol yangpela lain long ol skul long Goroka Distrik husat i gat bikpela laik long join na stap insait long ol wok bilong Skaut, Gel Gaid na Braunis.

“Olsem na long dispela as UNICEF i kam long halivim na givim sapot long kirapim bek Skaut, Gel Gaid na Braunis long Goroka”, Glama i tok.

Na bihainim wanpela besik trening woksop bilong ol Skaut na Gel Gaid lida, wanpela ten siks (16) lida (tenpela man skaut) na (siksela meri Gel Gaid) i bin greduet wantaim ol setifiket long greduesen seremoni we i bin kamap long Fraide wik i go pinis.

Ol wanpasin long Kasokana i kamapim belisi pasin

PASIN bilong kros, belhat na pait i go kam namel long wan wan hauslain em i no gutpela, long wanem dispela pasin i save kamapim birua na bruk namel long famili na ol wanpasin.

Kain pasin em i bin kamap namel long ol wanpasin lain manmeri long Kasokana hauslain long Yagusa eria long Okapa distrik, Isten Hailans provins long yia 2002.

Bihain long nainpela (9-pela) Krismas long pasin bilong pait na birua i go i kam, ol asples lain long hap husat i save kamapim kain pasin i luksave olsem dispela em i kamapim planti hevi namel long ol yet, olsem na ol i wanbel long putim daun ol pait samting na kamapim pasin belisi.

Mekim olsem na long Trinde long wik i go pinis, tupela grup husat i bin kros na pait i go i kam em Kunamasa na Wanigondo insait yet long Kasokana wanpasin hauslain i wanbel na kamapim pis seremoni we ol i lain long opis bilong Lo na Jastis Sekta na Polis long Goroka na Okapa i bin kamap na luksave long en.

Man husat i bin i go pas long dispela pis seremoni, Yokina Joe Monave, i tok dispela hevi i bin kamap bihain long tupela grup i bin sutim tok i go i kam long dai bilong wanpela famili memba bilong ol yet we ol i ting olsem em i dai long pasin poisin na sanguma.

Em i tok insait long nainpela krismas dispela hevi em i bin stap na planti samting long hauslain tu i bagarap nabaut.

“Dispela hevi i mekim na nogat gutpela developmen i kamap long hauslain bilong mipela. Ol pikinini i no go long skul, helt sevis tu i pas na ol arapela sevis we i sapos long go insait long viles na hauslain - em i no go kamap.

Dispela i mekim na mipela i pilim bikpela pen tru insait long dispela nainpela krismas. Olsem na nau mipela i wanbel na kamapim krismas pasin belisi long wanem ‘inap em inap’.

Mipela laikim olsem dispela pasin birua em i mas pinis olgeta, na belisi pasin em i mas kamap bai mipela i ken wokbung wanpela taim moa olsem bipo na kirapim bek ol viles na hauslain bilong mipela. Na ol pikinini bai ken go long skul, helt na ol arapela sevis i mas go bek na bikpela samting em mipela i mas wok hat moa long developim ples bilong mipela”, Monave i tok.

Em i mekim wanpela bikpela tok olsem sapos dispela pait i no nap long stop na i go yet, em olsem olgeta lain long haus na viles em ol lus lain tasol, na ol bikpela lusa em ol pikinini long wanem ol bai no nap long go long skul. Na dispela em bai ken bagarapim bihain taim bilong ol na tu dispela bai i ken bagarapim bihain taim bilong developmen long Kasokana hauslain na ol arapela viles tu we i stap klostu long em.

OL SU BLONG WOKIM BIKPELA WOK



NUBUCK - 8" LACE UP SUEDE LEATHER



EXPLORER - 10" LACE UP BROWN KIP LEATHER



benchmark
PRODUCT CERTIFICATION

- ✓ DUAL DENSITY POLYURETHANE RUBBER SOLE FOR EXTRA COMFORT AND INCREASED WEAR
- ✓ LIGHTWEIGHT
- ✓ PORON INNER SOLES FOR EXCEPTIONAL COMFORT
- ✓ WIDE STEEL TOE CAPS
- ✓ FULL LENGTH TONGUE
- ✓ CERTIFIED TO AS/NZS 2210.3
- ✓ OIL & HEAT RESISTANT SOLE
- ✓ PADDED COLLARS

BRUT - SLIP ON



BISHOP BROTHERS
everything for industry...

EMAIL: sales@bishopbros.com.pg

WEBSITE: www.bishopbros.com.pg



REDI LONG TAIM BILONG SAN: Wanpela lokol fama meri long Goroka, Isten Hailans, i givim sampela skul toktok long planim na kamapim ol Afriken yam na redi long taim nogut i kam long yia 2011. *Poto: Sape Metta*

Isten Hailans i redi long bungim taim nogut bilong bikpela san long 2011

Sape Metta i raitim

WANPELA intanesenel saveman husat i save lukluk na glasim klaimet senis na global woming long PNG i tokaut long wanpela bung long NSI long Goroka – Isten Hailans olsem long 2011, PNG bai bungin bikpela hevi kisim taim long bikpela san (El nino) na tu bikpela tait wara (La nina) bai ken kamap na planti lain manmeri na pikinini bai i ken bungim taim nogut inap long wanpela yia.

Dokta Akkinapally Ramakishna, husat i wok olsem wanpela leksera long Nesenel Agrikalsa Rises Institut (NARI) long Aiyura, i tokim ol lain husat i bin

sindaun long wanpela bung long NSI long Goroka – Isten Hailans i no long taim i go pinis olsem taim nogut i kam klostu nau olsem na ol lain manmeri long Isten Hailans na olgeta arapela provins tu long PNG i mas redi nau long bungim dispela ol taim nogut long taim em i kamap long 2011.

“Long planti ol eria insait long PNG bikpela san bai kamap na ol kaikai tu bai drai, na long ol arapela eria, ren bai pundaun na tait wara tu bai kirap na ol manmeri na pikinini bai ken kisim taim.

Kaikai bai sot na bikpela hangre tu bai kamap olsem na mi laik toksave long ol manmeri long ol viles na hauslain na taun komyuniti long ol i mas redi long bungim dis-

pela ol taim nogut,” Dokta Ramakishna i tok.

Em i tok long redi, ol manmeri i mas stat nau long planim na groim ol kaikai samting olsem yam, tapiok, strongpela kalapua banana na ol narapela kaikai moa we i ken gro na karim kaikai long dispela ol taim nogut.

Em i tok kain hevi i bin kamap long 1948, 1972, 1981 na 1997. Tasol long dispela ol yia i nogat ol hevi i bin kamap we ol manmeri i dai o kisim bikpela bagarap.

“Tasol long 2011, i luk olsem planti hevi na bagarap bai i ken kamap sapos yumi i no nap redim yumi yet,” Dokta Ramakishna i tok.

Niuspepa gat nem long ol luksave awot bilong 2010

Nicky Bernard i raitim

TRIPLELA niuspepa bilong yumi long kantri kisim luksave long Media Kaunsel bilong Papua Niugini long ol bikpela wok ol niusmanmeri bilong ol i mekim dispela yia.

Long Fonde wik i go pinis, Media Kaunsel i bin holim midia awot nait, long luksave long ol niusmanmeri, potograpa, na ol TV na Redio progroma insait long kantri.

Long dispela nait, ol bikman bilong PINA o Pasifik Ailans Nius Asosiesen tu bin stap long lukim husat ol biknem niusmanmeri bai kisim ol dispela awot.

Post Courier niusmanmeri i kisim 4-pela awod, The National kisim 2-pela na *Wantok Niuspepa* yet i kisim wanpela dispela em bilong niuspepa na redio na tv tu kisim awod bilong ol yet tu.

Long niuspepa, Simon Eroro, Politikal Ripota (Post Courier) Maureen Gerawa, Edukesen Ripota (Post Courier), Patrick Levo, Fitsa Raita (Post Courier), Harlyne Joku, Environmen Ripota (Post Courier), Julia Daia Bore, Kot Ripota (The National),



POTOMAN: Nicky Bernard (Wantok Niuspepa) i winim William Williano potograpa awot long kamap namba wan potograpa bilong 2010.

Angeline Karius, Sumatin Ripota bilong yia (*The National*) na *Nicky Bernard* (Wantok Niuspepa) i winim *William Williano* potograpa awot long kamap namba wan potograpa bilong 2010.

Ol redio na TV em, Toa Sime, Helt Ripota (NBC), Gabriel Bego, Investigativ Ripota (NBC), Meredith Kusa, Spot Ripota (EMTV), Kas T na Papa Erifuka kisim awot

bilong namba wan redio entatenmen.

Media Kaunsel tu i givim sampela spesol awot long dispela nait, sampela bilong awot ol rausim long wanem i nogat planti lain i resis long en.

Digicel PNG em mama sponsa bilong dispela awod nait wantaim sampela bilong kampani husat i sponsaim wanwan awot yet.



NOTIS I GO LONG OL SAPLAIA BLONG OL GUDS NA SEVIS I GO LONG GAVMAN DIPATMEN PROVINSOL NA LOKOL LEVEL GAVMAN

2010 PASIM BLONG OL AKAUNTS

TOKSAVE LONG ARERE BILONG 2010 FAINENSOL YIA I GO LONG PABLIK OLSEM:

- Laspela dei long givim aut ol nupela Integrated Local Purchase Order Claim (ILPOCs), na tok orait long commitment i go long Gavman PGAS em long deit **13th DISEMBA 2010**. Bai nogat nupela ILPOC bai go aut bihain long dispela deit, **13 DISEMBA 2010**.
- Peimen bilong ol guds na seves i go long husat i givim ol samting long Gavman, yusim ol trupela ILPOC bai go yet inap **31st DISEMBA, 2010**.
- Gavman bai baim husat saplaia sapos yu givim ol invoices bilong yu i go inap arere blong bisnis long deit **10th DISEMBA 2010**. Sapos yu givim ol guds na seves pastaim long **10th DISEMBA 2010**, yu bai ol baim yu long 2010 yia.
- Olgeta invoices na wanem kain askim yu gat imas go long pei opis bilong wanem gavman dipatmen husat i bin yusim guds na seves blong yu. Noken karim ol kleims bilong yu i go long dipatmen bilong Fainens.
- Toksave ken olsem Gavman bai baim tasol ol opisol ILPOC na i no ol narapela kain kleim. Dispela em i Lo.

Authorised by:
GABRIEL YER
SECRETARY BLONG FAINENS

Sik kolera kilim moa long 200 pipel long Westen provins

SIK KOLERA i wok long go bikipela long Daru na ol narapela eria long Westen provins na ol ripot i tok namel long 200 na 300 pipel i dai long dispela sik pinis.

Em i samting olsem tupela wik nau taim ol ripot long dispela sik long Daru Ailan i kamap.

Ol ripot i tok Daru Jenerel Haus sik i rekotim 32 pipel i dai

taim ol narapela em ol i ripotim long ol helt senta na etpos long ol rurel eria. Na tu, long ol ples i stap longwe na ol i no kisim gavman sevis.

Westen provins em i ples bilong bikipela maining kampani, Ok Tedi Main Limitet, tasol planti hap bilong provins i nogat gutpela rot netwok i go long ol ples. Olsem na em i hat taim ol imejensi keis na

bikipela sik olsem kolera i kisim pipel i stap longwe long ol helt senta na haus sik.

Ol ripot i tok long Daru Ailan, sik i go daun bikos ol siklain i kisim helpim, tasol long ol rurel eria na ol ples longwe, we moa pipel i wok long dai yet.

Long dispela taim, wanpela tim i gat long em ol lain bilong Wol Helt Ogenaisesen, AusAID, Nesenel Helt

Dipatmen na ol sios i putim han wantaim na go aut long helpim wantaim wok long sevim ol laip.

Ol ripot i tok long sampela viles, klostu long 30 pipel i dai hariap tasol bihain ol i kisim wanpela sik pekpek wara, tasol i nogat haus sik o helt senta i stap klostu we ol inap kisim helpim.

Ol Tem holide na ol bikipela de long 2011 skul kalenda

... Ol skul mas luksave na mekim wok redi

DISPELA em ol bikipela det bilong 2011 skul yia we Ekting Sekreteri bilong Edukesen, Dokta Joseph Pagelio i laikim bai ol skul, ol tisa na ol papamama i mas save long ol na redi na mekim ol wok plen long ol samting i go gut. Ol bikipela det i go olsem.

- Mande Februari 7, 2011: Nupela skul yia i stat. Tasol ol tisa i mas stap long skul bilong mekim ol wok redi long Mande Januери 32, 2017, 2011. Long dispela taim tu, ol het tisa na prinsipel bai stretim ol skul

enrolmen wantaim ol skul gavaning bodi.

Fonde Epril 21, 2011 em Tem 1 i pinis na ol sumatin bai go long wanpela wik malolo. Bikos Ista bai pondaun insait long dispela wik, Epril 22 i Gut Fraide na pablik holide wantaim tu Ista Sande na Mande.

- Mande Me 1, 2011 em Tem 2 bai stat na pinis long Fraide, Julai 8, 2011. Ol tisa bai gat wanpela wik malolo taim ol sumatin i gat tupela wik. Ol tisa husat bai go insait long Nesenel Populesen

Sensus bai gat wanpela wik Insevis Trening bilong ol. Long dispela tem, tupela pablik holide bai kamap. Em long Kwins Betde i pondaun long Mande Jun 13 na Nesenel Rimembrens De long Sarere Julai 23.

- Mande Julai 25 Tem 3 bai stat na pinis long Septemba 23, 2011. Bai gat wanpela wik Malolo tasol i stat long Mande Septemba 26 na pinis long Fraide Septemba 30, 2011. Wanpela pablik

holide em Indipendens de i pondaun long Fraide Septemba 16.

- Oktoba 3 em Tem 4 bai stat na pinis long Fraide, Disemba 9, 2011. Na ol tisa na sumatin bai go long 6-pela wik Krismas skul malolo bilong ol.

Ol narapela bikipela de long 2011 skul kalenda we skul bai redi long ol na selebretim em long Ogas 1-5 em Nesenel Bukwik, Septemba 5-9 em Nesenel Literesi Wik na Oktoba 3-7 em Nesenel Edukesen Wik.

4-pela Morobe skul kisim ol nupela klasrum na haus tisa

SKUL enrolmen long Makam Distrik, Morobe provins bai go antap neks yia bihain long opim ol nupela klasrum bilding long 4-pela praimer skul.

Ol 4-pela Praimeri skul em Waritsian, Zumara, Mutzing na Ngarianwang Praimeri skul. Kos bilong ol dispela skul bilding em K871,476.00.

Kaunselu bilong Dipatmen bilong Foren Afeas na Tred long PNG em Adrian Lochrin i bin opim ol dispela 4-pela dabel klasrum na 4-pela haus tisa long 4-pela skul.

Ol nupela bilding i makim tu gutpela wok patna namel long PNG na gavman bilong Australia long givim sans long ol PNG pikinini i kisim edukesen.

Dispela ol klasrum bai givim sans long ol sumatin i sindaun gut na skul taim ol haus tisa bai helpim ol tisa husat i stap long ol haus i no gutpela tumas.

Taim em i autim tok tenkyu bilong em i go long gavman bilong Australia long helpim bilong em, memba bilong Makam em Koni Iguan i tok moa sumatin bai gat spes long go skul na dispela bai pulim moa tisa i laik wok long ol skul.

Long makim Mista Iguna, Distrik Edministreta, Benson Bebisano, i bin givim wan wan skul sekmani inap long K3,000 long baim ol samting long ol haus bilong ol tisa.

Aninit long Australia-PNG Patnasip bilong Dvelopmen, 6-pela eria ol i sapotim em long sapot long ol skul bilding long ol skul long kantri i gat nit, givim ol teks buk na skul matiriel long ol skul long kantri, givim fanding sapot long sapotim skul fi subsidi bilong (PNG) gavman i go long ol skul na sapotim ol skul menesmen na skul lainim impruvmen plen.

Kaunselu Lochrin i bin tok Australia i fomim strongpela wok patna wantaim Edukesen Dipatmen, ol provins na ol narapela patna long sapotim edukesen sistem long PNG.

Nupela akaunting teks buk bai helpim ol tisa na sumatin



OL NUPELA AKAUNTING TEKS BUK: Akaunten, leksera na raita, Panditha Bandara, wantaim 4-pela nupela teks buk em i raitim bilong ol PNG sekonderi skul i prisenim i go long Gavana Jenerel Se Paulias Matane.

EDUKESEN sistem long PNG i mas resis na estap long wankain level wantaim ol narapela kantri we ol sumatin bilong yumi i ken go skruim skul wantaim nogat wari.

Gavana Jenerel Se Paulias Matane i wokim dispela toktok long buk prisentesenlong dispela wik we wanpela leksera long Yunivesiti bilong PNG (UPNG) i bin raitim kamap 4-pela buk na givim i go long Se Paulias.

Man i raitim ol 4-pela Akaunting buk em Panditha Bandara em sinia leksera long Akaunting long UPNG.

Em i raitim ol dispela buk bilong ol sekonderi skul na ol haia lening o teseri skul long PNG na prosenim long Gavman Haus. 4-pela buk em Bisnis Stadis Gret 9, Akaunting Gret 11, Akaunting Gret 12 na Introdakteri Akaunting bilong PNG.

Se Paulias i tok long level bilong edukesen long PNG i kamap gut, yumi mas gat ol gutpela teks buk long praimer na sekonderi level.

Em i tok skulim akaunting na bisnis stadis i gutpela bikipela samting long PNG na moa yet nau bikos long iekonomik developmen i kamap hariap long kantri long dispela taim long maining, wel, ges na petroleum sekta.

Taim Se Paulias i tok amamas long Mista Bandara long raitim kamap ol dispela buk we bai skulim ol save manmeri bilong bihain taim long PNG, em i tok man i raitim teks buk i mas gat save, ekspiriens na komitmen. Na tu, Edukesen Dipatmen i mas yusim gut ol dispela buk.

Mista Bandara i tok Edukesen Dipatmen i kamapim ol nupela subjek we ol skul bai lainim long ol sumatin, moa yet long ol

sekonderi skul. Tasol ol tisa na sumatin i wok long painim hat wantaim ol metiriel long helpim ol long lainim bilong ol.

Em i tok em i luksave long dispela hevi na i raitim ol dispela buk olsem ansa long ol hevi.

Em i raitim ol buk long isipela toktok na givim ol tok klia we i mekim isi long ol sumatin na tisa long yusim.

Em i tok em i gat plen long raitim sampela moa buk. Mista Bandara i bilong Sri Lanka tasol em i wok olsem sinia leksera long Akaunting long Skul bilong Bisnis Etministresen long UPNG.

Em i gat bikipela save long wok akaunten, raitim ol teks buk na tising. Em i raitim pinis sampela buk bilong ol skul na ol yunivesiti long kantri bilong em yet. Email kontek etres billong en em : bandarap@upng.ac.pg



Jastis o Nogat?

I GAT wanpela stori ol i raitim long niuspepa i stori long wanpela meri i HIV pinis i bin go "maritim" wanpela man. Bihain man i painimaut meri i gat HIV na em i kotim meri. Polis i sasim meri na kalabusim em i go inap bikipela kot bai kamap. Het tok bilong stori em: "Woman with AIDS charged". Tasol, mi gat wanpela askim. Polis i mekim stretpela pasin o nogat?

Yumi go bek long stori. Wanpela meri, kris-mas bilong em 25, bilong Koromi viles long lalibu i bin maritim man bilong Kandeyapu viles bilong Pangia. Man i gat 60 krismas. Man i bringim meri i go long ples bilong em na tupela i slip-wantaim long Novemba 4 na 8. Bihain man i painimaut dispela meri i HIV pinis na em i go long polis, na meri i kamap long Mendi Distrik kot.

Wanpela askim em, tupela i marit tru o wanem samting i kamap? Meri i gat 25 krismas na man i gat 60 krismas. Olsem wanem yangpela meri i go wantaim lapun? Pastaim yumi mas klia long wanem samting yumi inap kolim "marit" na wanem samting em "pamuk pasin" na wanem samting em "baim meri". Wanpela samting i klia, lapun i no skelim gut meri pastaim, olsem ol i save mekim bipo long marit. Sapos lapun i bin sindaun wantaim famili na skelim gut pasin bilong meri bai em i save em i wanpela sik-meri na em i wok long dring marasin bilong HIV. Ating lapun i lukim wanpela yangpela meri na mangal bilong em i win. Em i hariap na go slip wantaim dispela meri. Nau, bihain taim, em i wari long laip bilong em.

Narapela askim em, lapun i marit bipo? Em i gat narapela meri o em i gat arapela gelpren nau? Yumi no save, dispela em namba wan taim lapun i pren wantaim wanpela meri?

Go bek long stori. Polis i kotim meri na ol i kolim rong meri i mekim: "intentional transmission of HIV". Mining bilong dispela tok em i olsem, meri i gat tingting, o em i laik givim HIV long man. Dispela samting i tru o nogat? Kot inap pruvim dispela samting o nogat?

Narapela samting, i luk olsem lapun i pret meri i givim HIV long em. Ol i pren long Novemba 4 na 8 tasol. Nau ol i mas wet long 6-8 wik bipo lapun i sekim blut ("window period"). Nau, mun Novemba 2010, em i no save meri i givim HIV long em o nogat. Mun Disemba i pinis em i ken sekim blut bilong painimaut. Narapela samting, bikos wanpela i HIV pinis na tupela i pren wantaim, i no olgeta taim wanpela i givim sik long narapela. Sampela taim nogat! Sekim blut em rot tru bilong painimaut. Tasol, olsem wanem polis i hariap na go kotim meri na ol i no save man i kisim HIV o nogat?

Narapela samting em, sapos lapun i bin pren wantaim narapela meri, em i no inap tok dispela meri i givim HIV long em - bikos em inap kisim long narapela meri tu!

Sampela strongpela tok:

Man o meri i HIV pinis i no ken go slip nabaut long laik bilong em yet. Yu laik pren wantaim narapela yu mas tokim poro bilong yu pastaim yu HIV pinis. Sapos nogat, polis inap kotim yu. Yu givim sik HIV long narapela, yu brukim lo bilong kantri na Lo bilong God wantaim.

Bipo yu prenim narapela, yu mas save em i gat HIV of nogat. Sapos nogat, yu wanpela longlong man tru!

Bipo, ol man na meri inap pren nabaut nat-ing. Tasol, nau nogat! HIV i kamap bikipela pinis insait long komyuniti na yu no save husat i gat dispela sik.

Polis i ken kotim meri sapos em raun nabaut givim sik HIV long narapela. ("high risk behaviour"). Tu, sapos meri i givim pinis sik HIV long wanpela man - tasol yu inap pruvim dispela meri i givim long dispela man? Yu inap pruvim, meri i gat laik long bagarapim dispela man na em i mekim olsem.

Yumi mas redi nau long kisim Jisas

JISAS i bin kamap long dispela wol long rot bilong daun pasin taim mama i karim em long ples kaikai hap bilong ol sipsip.

Olsem na yumi redi long kisim em (Jisas) long hat bilong yumi long Krismas, Asbisop bilong Pot Mosbi Katolik Asdaiosis, John Ribat i bin tok olsem long las wik Trinde long lonsing o opim krismas festival long Mosbi siti.

Opis bilong Nesenel Kapitel Distrik Gavana, Powes Parkop i bin redim na bilasim Jack Pidik Pak, 5 Mail olsem ples we ol Krismas selebren long siti bai kamap long en. Na ol bin klinim, putim ol kain naispela bilas long ol Krismas tri, ol animal na "manger" ol ples bilong ol



BLESIM KRISMAS BILAS: Asbisop John Ribat bilong Pot Mosbi Katolik Asdaiosis i blesim Jack Pidik Pak Krismas lait na bilas eria. Foto: Nicky Bernard

sipsip i kaikai long en tasol ples tu we Mama Maria i bin karim Bebi Jisas long em moa long 2000 yia i go pinis long Krismas nait. Nau Jack Pidik Pak eria em bikpela hap eria i save lait gut tru

olgeta nait wantaim ol kain naispela krismas tri lait na ol narapela bilas moa.

Gavana Parkop na NCD i wokim ol dispela ol samt-ing long amamasim ol manmeri na pikinini insait

long siti na ol i pilim spirit na amamas bilong Krismas.

Gavana Parkop i bin askim ol famili long siti long go raun lukim dispela ples na kisim piling na amamas bilong Krismas.

Taim em i askim ol manmeri long siti long wok bung wantaim ol lida bilong ol, em bin skruim toktok i go moa na tok olgeta manmeri i gat wok long kipim Mosbi siti i klinpela na tu, daunim hevi bilong lo na oda. Na Moisi i ken kamap wangepela naispela na klinpela ples bilong stap long en.

Taim Asbisop John i blesim ples na ol krismas bilas, em bin tok husat lain i laik go wokim ol lotu selebren long hap i ken.

GLASIM TOK
WANTAIM
Fr Lollington Wiam



Gavman i mas tok klia long wok bilong "makim na ilektim" ol meri

LONG las tupela wik i go pinis yumi harim bikpela pairap i kamap long ol meri insait long PNG, long wanem ol meri i laikim palamen haus i mas tok orait long 22 risev sit bilong ol. Sapos ol memba i pasim dispela bil, em 22 ol meri bai makim maus bilong tri milion meri long palamen. Tru tumas, yumi lukim ol meri i hat-bit tru long lukim kaikai i mas kamap long haus palamen. Planti mama i tromoim bikpela mani long kisim balus long kam na lukim wanem tok bai kamap long Waigani. Tasol sori tru, tingting ol i gat i nogat kaikai na ol i belhat long ol memba bilong ol. Dispela kain politik i pani tru long PNG long wanem yumi laik pilai politik, yumi mas go long ples bilong vot stret na resis long husat bai win.

Em demokretik sistem bilong dispela kantri na wol. Em lo bilong win stret, tasol pasin bilong "givim nating" samtig em korapsen. Sapos yumi glasim gut tru, yumi lukim olsem gavman i laik givim nating 22 risev sit i go long ol meri. Sapos dispela lo i kamap na palamen i pasim dispela 22 meri bai resis long ileksen olsem provinsel gavman long 22 provins, ol bai makim tasol na bai ol i kam long palamen. Nau dispela wod resis olsem wanwan provins bai makim klia hamas pela kandidat meri resis olsem provinsel sit na wanpela tasol bai win na makim maus bilong ol meri long provins bilong ol.

"Makim nating" em min olsem ol meri yet long wanwan provins bai ol kam bung na makim nating wanpela namel long ol bai makim maus long palamen. Sori tru, dispela pasin bilong 'makim nating', ol meri long ol distrik, bikbus na strit meri bai ol i nogat sans. Em min olsem, em samtig bilong biksot meri tasol na ol bikmeri husat i gat nem tasol bai stap long palamen oltaim. Em nau, yumi olgeta i mas save olsem pasin bilong ol meri i narakain tru. Olsem pasin bilong belhat, pasin bilong tingting nogut, pasin bilong tok baksait na planti moa bai bagarapim gut tru long wok politik bilong ol meri. Em nau, i gat asua i stap. i moa gut gavman i mas tok aut stret wanem rot bai dispela sistem bai ol meri i bihainim. Rot bilong "ileksen" o rot bilong 'makim nating'. Sapos rot bilong "Makim nating" orait, mi laik singaut i go long gavman long mekim wankain long sios na ol yut. Yumi laikim 22 moa risev sit bilong ol sios na 22 moa risev sit bilong ol yut. Em i gutpela rot long balensim haus tambaran long maus bilong ol meri, sios na ol yut. Watpo na dispela i mas kamap, bikos em i no stret long gavman i laik "givim nating" 22 risev sit i go long ol meri. Olsem na ol sios na ol yut tu i mas wok hat nau long pusim tupela bil moa i go long sindaun bilong palamen.

Wanbel pasin long Bundi LLG stretim hevi namel long ol sios

WANBEL pasin i kamap pinis namel long ol Katolik pipel na Baptis na Foskwea sios memba long Bundi eria, Madang, long ol i lusim tingting long ol hevi samtig i bin kamap klostu long 10-pela yia i go pinis na bagarapim gutpela wok pren namel long ol.

Hevi i bin kamap long yia 2001 yet taim ol narapela lotu memba i bin brukim Katolik Sios haus lotu long Bundikara Wod i stap aninit long Bundi LLG Lokol Level Gavman. Ol dispela lain i bin brukim sios bilding na kisim ol kapa na salim. Olsem na hevi i stap i go inap nau taim ol i bin holim wanbel na sekan pasin insait long wanpela felosip program.

Peris pris bilong Bundi, Pater Anton Gambu, i tok felosip na sekan program i bin kamap long 4-pela de long 4-pela wik i go pinis. Het tok bilong program em "Humen Dvelopmen long Spirituel Tising na Rikonsiliesen (HDST)".

Pater Anton i tok bikpela as ting-

ing bilong dispela kombain felosip em long autim tok sore long bagarapim Katolik haus lotu em ol pipel i brukim na salim ol kapa samtig long yia 2001, na ol i ken kirapim bek Katolik bilip.

Long strongim wok blong sios insait long komyuniti na givim stretpela tingting long ol manmeri long tok bilong God.

Long givim gutpela tingting long ol yangpela na ol mama long tok bilong God na bai ol i luksave long wanem kain bagarap bai kamap bihainim divelopmen bilong tupela bikpela main long LLG na bilong abrusim sik AIDS long Tok bilong God.

Insait long dispela bikpela het tok H.D.S.T, ol bin singautim planti lain long kamap, tasol bihainim hevi bilong rot ol ino bin inap long kamap. Olsem na Pater Anton wantaim ol yut lida olsem Michael Gene (Apo, Pasto Peter Kuwere na Markus Angiva, Foskwea Bundi Pasta Peter Waieng bilong Snow

Pas na Het Masta bilong Bundi Praimeri skul em Simon Angiva i bin givim ol skul tok na awenes.

Maski ol bikman tu ol i no go kamap tasol dispela kombain felosip i bin kamap gut tru. Na olgeta komyuniti i wanbel long olgeta gutpela tok ol bin kisim. Sampela ol lain i kam olsem long Bundi na Snowpas tu i bin stap long dispela taim. Ol i bin amamas na tok dispela kain bung i mas kamap long olgeta 22 wod long LLG bilong givim gutpela na stretpela tingting na ol manmeri i mas redi long ol hevi tu.

Wod memba na ol komiti na tupela lokol Pasto na Peris Pris i bin tok wankain bung i mas kamap long Nu Yia taim.

Olgeta Katolik manmeri long dispela wod eria i tok amamas na autim bikpela tenkyu i go long Foskwea na Baptis Sios long sapotim ol long kirapim Katolik bilip insait long komyuniti gen bihain long 9- pela krismas olgeta.

25 yia Asbisop John i makim olsem pater

ASBISOP bilong Katolik Asdaiosis bilong Pot Mosbi, Asbisop John Ribat i bin selebretim 25 yia bilong em olsem wanpela pater long las wik Fonde.

Long selebretim dispela Silva Jubili bilong em, ol bin holim wanpela misa lotu long Sen Mary's Katitrel sios long taun we ol rilijes, ol pren, wantok na Katolik sios memba insait long ol peris long Pot Mosbi Asdaiosis i bin kamap long en.

Asbisop John i bin autim tok tenkyu long planti blesing God i givim long em insait long 25 yia em i mekim wok olsem wokman bilong Bikpela. Na ol lain i helpim em na kamap olsem hap long sios wok ministri long 25 krismas.

Asbisop John i tok tru, 25 krismas em i longpela taim em i karimaut wok long sios, dispela taim i mekim ol lain we Bikman i singautim ol long kamap pater long skruim wok gut long givim sevis i go long ol pikinini bilong God insait long laip bilong ol.

Mama i bin karim Asbisop John long ples Volavolo, Is Nu Briten long yia 1957. Em bin go skul seminari long Sekret Hat Misinari na kisim namba wan promis long yia 1979. Bihain long em i pinisim skul seminari long Bomana, em bin kamap pater long Rabaul long Disemba 1, 1985. Namba wan ples em bin go wok long en em Sen Paul's peris long Veifa'a Daiosis

long Bereina. Em bin wok long Bereina Daiosis inap long 1991 bipo em i go long Manila, Filipins

Taim em i kam bek long PNG long 1994, ol bin makim em Novis Masta bilong ol MSC PNG Provins. Bihain em bin kamap Novis Masta long Pasifika na go beis long Suva.

Long Novemba 2000, ol bin makim em Oksileri Bisop bilong Bereina. Na long yia 2002, em bin kamap Bisop bilong Bereina. Long mas 2008, em bin kamap olsem Asbisop bilong Asdaiosis bilong Pot Mosbi Asdaiosis, wok we em i holim i stap olsem namba 5 hetman bilong Katolik Sios long Mosbi siti.

Meri ogenaísesen helpim ol yut

Veronica Hatutasi i raitim

WANPELA ogenaísesen we i wok long helpim ol yangpela pipel long save long seksual helt bilong ol yut na ol i ken lukautim ol yet, famili na kantri em Yang Wimens Kristen Asosiesen (YWCA).

YWCA em asosiesen bilong ol meri, yangpela, ol wok meri na ol bikpela meri i gat laik long promotim na helpim ol meri na yangpela pipel long kamap ol gutpela pipel na soim lidasip insait long famili, komyuniti na kantri.

Lorraine Siraba em dispela yangpela meri i save go pas long ol program bilong helpim ol yut i skul na i stap nating long riprodaktiv helt na ol narapela helt isu.

Meri Wantok i bin bungim na stori liklik wantaim Lorraine long Wol AIDS De selebresen long Se John Guise Stadium las wik Trinde. Ol bin sanapim wanpela sel kanvas (canvas tent) we ol yut i soim ol samting ol i mekim, ol liklik buk ol i kamapim na prininim i gat ol toktok long givim tok skul na awenes long seks, riprodaktiv helt na ol narapela samting i ken givim gutpela stia long laip na sindaun bilong ol oslem wanwan long ol, family, komyuniti na kantri.

Dispela ol yut em ol skul

sumatin na ol lain i stap nating husat i fomim wanpela klab ol i kolim long Yut na Adolesen Helt Klab (YAH).

“YAH i wanpela klab we ol skul sumatin na ol narapela yangpela pipel i stap nating i fomim long helpim ol yet na ol narapela wanlain yangpela pipel long promotim stretpela pasin namel long ol yangpela yet. Na tu, em i sans bilong ol yangpela long go na kisim infomesen long ol samting na ol i ken helpim ol yet,” Lorraine i tok.

Em i tok ol lain i kamap memba bilong YAH i save kisim wanpela wik trening long besik introdaksen long riprodaktiv helt na “peer” edukesen o trening long skulim ol wan krismas grup na pren bilong ol.

“Bihain long trening, ol yangpela i save go bek long ol wan wan eria o ples ol i stap long en o ples we ol i laik go long en na toktok na skulim ol “peer” grup lain,” Lorraine i tok.

Lorraine i tok dispela ol yangpela YAH lain em ol spesel grup husat i wok long kamap wantaim ol nupela tingting long kirapim bel na kisim ol mesej o toktok i go aut long ol wan krismas lain bilong ol.

“Wanpela samting tasol em i nogat ol metiriel bilong ol yangpela pipel na olsem, dispela ol YAH i kamapim ol

risos bilong ol yet na ol narapela yangpela pipel long ol samting i karamapim ol.

Samting olsem 80 yut i gat namel long 12 na 25 krismas i stap long YAH na mekim ol wok i stap. Ol i save bung long wanpela taim insait long wanpela mun. Ol i kam long ol wan wan skul wantaim tu ol yut i stap nating insait long NCD. Simbu provins i gat wanpela ha n billong YAH i wok i stap,” Lorraine i tok.

“Ol yangpela pipel i kam long ol wan wan skul na komyuniti na i bung long YAH na wokim samting i gutpela bikos dispela tu bai helpim daunim ol hevi long pait namel long ol skul we i kamap planti taim insait long siti na kantri. Na tu, kamapim ol mesej o toktok na rot we bai daunim binatang bilong AIDS i kalap i go long moa pipel.

“Planti ol dispela yangpela i gat ol gif na save long mekim ol samting olsem ol i pilaim musik, ol singa, ol ekta na mipela i laikim bai ol i mas go insait long ol wok i karamapim ol,” Lorraine i tok.

Yunaitet Nesens Famili na Populesen Asosiesen (UNFPA) i fandim o givim mani long ol YAH i pablisim na kamapim ol risos na awenes buklet em ol i yusim nau.



HELPIM OL YANGPELA: Lorraine Siraba bilong YWCA na Yut & Adolesen Riprodaktiv Helt (YAH) na Tok Stret Program i sanap wantaim wanpela yangpela i putim klos bilong klaun o paniman long Wol AIDS De selebresen long Se John Guise Stadium las wik Trinde. Poto: Veronica Hatutasi



OL YANGPELA HELPIM OL NARAPELA : Foapela yangpela i memba bilong Yut na Adolesen Riprodaktiv Helt Klab (YAH) i amamas long soim ol buklet ol i kamapim i gat ol tok skul we ol narapela yut i ken kisim ol skul na tok stia long ol. Poto: Veronica Hatutasi

Ol yangpela meri i helpim ol turangu na sevim environmen

LONG olgeta level bilong developmen bilong man na kantri, ol meri i wok long mekim ol kontribusen bilong ol.

Wanpela eria we ol meri na moa yet, ol yangpela meri, maski ol i skul o wok i stap, pasin bilong helpim ol narapela i stap long hevi o ol turangu, soim luknais bilong ol olsem ol yangpela meri bilong wol yumi stap long en tude, soim save bilong ol long ol samting i kamap long kantri na wol, tumbuna na kastom pasin bilong kantri ol i kam long en, soim luknais bilong ol na ol narapela eria moa em eria we i kisim ol meri i kamap long ples klian na makim ol wan wan kantri bilong ol.

Long PNG, yumi lukim tasol wanpela resis long Mis Pasifik Kwin i kamap na wanpela yangpela meri

Kuk Ailan i winim taitel long 11-pela naispela meri bilong 11-pela Pasifik Ailan kantri i bin go insait long resis.

Yumi yet long kantri i gat Mis PNG resis we ol yangpela meri PNG yet i save sanap resis wantaim bikpela tingting long kamapim mani bilong PNG Ret Kros. Na Ret Kros i yusim mani long helpim ol turangu na ol lain i bungim hevi long ol naturel disasta o hevi bilong guria, graun i bruk, solwara i solap na ol narapela moa.

Long las wiken tasol, wol i holim Mis Earth resis we ol yangpela meri long ol kantri long wol i save go insait long en.

Bikos Klaimer tenis i wok long kamap bikpela samting i karamapim wol tude, Mis Earth i wanpela rot long karimaut awenes bilong lukautim bus-

graun bilong yumi.

Mis India, Nicole Faria i gat 20 krismas na i wanpela modol long Bnagalore, India na i bin Mis India pastaim, i bin winim Mis Earth Taitel long 84 yet i save sanap resis wantaim bikpela tingting long dispela resis. Niola i

Askim we Nicole i bin bekim na winim taitel em, Wanem awa long de em i laikim. Na ansa em, San i kamap taim bikos em i yangpela na em i save wetim wanem samting bai nupela moning i bringim.

Wanpela bikpela samting nau bai Nicole i laik mekim em long karimaut na strongim ol awenes na wok bilong lukautim environmen na ol naturel risos.

Narapela bikpela resis i save kamap olgeta yia long globol level em long Mis Wol.

Ol IPA pikinini i gat spesel bung kaikai

Ivan Bayagau i raitim

KRISMAS na Fada krismas i bin kamap hariap long ol pikinini bilong ol Invesmen Promosen Atoriti (IPA) woklain.

Dispela em long las wik Sande taim ol pikinini bilong ol Koporet Sevis Divisen na Eksekutiv Sevis Yunit bilong IPA i bin holim wanpela spesel dina long ol pikinini bilong ol long Holide In Pulsait.

Long dispela taim tu, ol pikinini i bin gat taim bilong amamas na pilai na tu, Fada Krismas i bin raun i go lukim ol na givim ol presen.

Ol pikinini i gat namel long 2 na 15 krismas i bin kisim dispela sans long sea na save long ol narapela pikinini na tu, amamas long ol samting we ol papamama i putim kamap long ol. Dispela em ol samting olsem kwis na ol ridel we ol papamama yet i bin redim long ol.

Ol pikinini i tok ol bin



OL PIKININI GAT GUTPELA NAIT: Prinses Lunar Poma-leu i amamas long kisim presen long Santa o Fada Krismas. Poto: Ivan Bayagau

amamas long dispela nait na lainim planti samting long wanpela narapela.

Monica Sapulai na Liza Koloa i bin go pas

long kamapim dispela spesel dina nait bilong ol pikinini. Ol i tok bikpela tingting long dispela bung em long ol woklain i save long ol

pikinini bilong ol wanwok bilong ol. Na tu, long ol pikinini i save long wanpela narapela.

“Olsem ol wanwok, dispela bung kaikai i bin givim sans long yumi bungim ol pikinini na ol man na meri bilong ol woklain,” Misis Sapulai i tok.

Olgeta i bin amamas tru na moa moa yet long ol pikinini husat i bin amamas tru wantaim ol kain kaikai ol bin kisim wantaim tu ol presen.

Bikos dispela nambawan bung kaikai i bin kamap gutpela, ol i tingting long holim wankain samting wanpela taim long olgeta yia.

“Mipela i bin makim “Royal” olsem het tok bilong mipela long wanem, wan wan long ol pikinini i bin kamap long dispela bung kaikai long nait i bin gat kraun na taim ol i bungim ol narapela, ol bin kolim ol olsem Prins (Jon) o Prinses (Diana),” Misis Sapulai i tok.



TOK PISIN NEWS
from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

Tok Pisin Service
6am - 7am 6080; 7240(KHZ)
7pm - 9pm 5995; 6020; 9710; 1280(KHZ)

43 pipel i dai long Pakistan bom pairap

NAMBA bilong ol pipel i dai long tupela bom pairap long wanpela ples bilong Pakistan klostu long boda mak wantaim Afganistan nau i go antap long 43.

Tupela suisait boma i werim yunifom bilong olis i bin pairapim dispela tupela bom klostu long wanpela bung bilong ol gavman opisal, ol lain i agensim Taliban long ples ol i kolim Ghalanai, em i stap samting olsem 175 kilomit notwes bilong Islamabad.

Moa long 100 pipel i bin go stap long dis-

pela miting long wanpela kompaun taim dispela tupela bom i pairap.

Mausman bilong Pakistan grup em i han bilong Taliban, i bin tok ol tasol i bin kamapim dispela pairap na i bin tok husat pipel i kamapim tingting long pait agensim lain bilong em bai i dai.

Kebol aninit long solwara long Fiji i stap long list bilong Wikileaks

DISPELA kebol aninit long solwara bilong Fiji i bin stap long list bilong Wikileaks olsem ples, em i gat bikpela samting long wok sekyuriti bilong Amerika.

Fiji wanpela long ol 300 ol kantri em Amerika i bin makim olsem em i gat ol infrastraksa na ol risoses long sait bilong wok sekyuriti.

Amerika i bin krosim Wikileaks long i bin putim aut dispela infomesen, na i bin tok dispela bai mekim ol teroris grup long kamapim tingting long bagarapim ol ples olsem.

Kuk Ailans Demokretik Pati i no amamas long ol ileksen risal

DEMOKRATIK Pati bilong Kuk Ailans (Cook Islands) i salensim ol risal bilong ileksen em nau tasol ol i bin holim em ol i bin lus long en.

Laspela kaunim bilong ol vourt i bin givim Kuk Ailans Pati, 16 sia na Demokrets i gat tasol 8-pela.

Presiden bilong Demokretik Pati, Sean Will, i bin tok pati bai salensim ol risal bilong tripela sia, i tru em i tok dispela bai no inap kamapim wanpela gutpela samting long senisim risal bilong ileksen.

Tonga i kamapim loa long testim win bilong ol draiva

TONGA nau i kamapim loa we em i ken testim win bilong ol draiva long painimaut sapos ol i spak na draiv olsem wanpela we long daunim ol hevi bilong pipel i spak na draiv.

Komanda Chris Kelly, i bin tok Tonga Polis i bin kisim trening pinis long yusim dispela ol masin na tingting bilong kamapim dispela lo i bin gutpela stret.

Australia Red Cross bai go pas long wok bilong lukautim ol pikinni

RED Cross bilong Australia bai go pas long ol wok long rereim ol samting bilong ol famili na ol pikinini bolong ol asylum seekers em ol i kam ol yet long Australia long painim ples bilong ol long stap.

Long mun Oktoba dispela yia, Australia gavman i bin tokaut olsem ol pikinini na famili em ol i lusim ples bilong ol i laik kam stap long Australia, bai fri oa kamaut long ol ditensen senta na stap aut long komyuniti taim ol ofisa bilong imigresen i lukluk long aplikesen oa askim bilong ol.

Ektong CEO bilong Australia Red Cross, Michael Raper, i bin tok em i bikpela samting long ol pikinini i aut long ol ditensen senta.

PNG Soka tim Hekari i redi long Wol Club pilai

SEMPION bilong O-Lig, Hakari United bilong Papua Niugini, i stat rereim ol yet redi long wol klab gem bilong ol agensim hos tim, Al Wahda long Abu Dhabi long Fonde dispela wik, bihain long ol i autim Armed Foses tim bilong Qatar, 2-0.

Hekari i bin ronawe wantaim dispela win wantaim tupela gol long namba wan hap bilong pilai i kam long Kema Jack na Malakai Tiwa.

Hekari tim nau i bin winim siksipela gem bilong em stret pinis na nau i redi long bikpela gem bilong em tru agensim Al Wahda long Fonde dispela wik.

Shaymus Marten, Tim Menesa bilong Hekari, i bin tokim Radio Australia olgeta wok rere i go stret na bikpela samting long en ol i nogat wari long injari o birua long ol pilaia.

Askim i stap long PNG i joinim tingting bilong pait agensim korapsen

SEMBA bilong Mains na Petroleum bilong Papua Niugini, nau i askim gavman bilong Papua Niugini, long i mas kamap memba bilong bikpela tingting em planti ol kantri long wol i stap insait long pait agensim korapsen long maining indastri.

Niusmeri Jemima Garrett, i ripot lain ol kolim ol yet Ekstrektiv Indastri Transparensi Inisativ, em ol i bin kirapim long halivim ol kantri long was gut we ol maining kampani i mekim wok bilong ol na tu, ol i mas tokaut long olgeta mani ol i kamapim o kisim long wok bisnis bilong ol.

Na i kam inap nau, 32 kantri i joinim pinis dispela grup. Eksekutiv Dairekta bilong PNG Semba ov Mains, Greg Anderson, i bin tok putim dispela tingting long wok bai i gutpela samting tru bilong Papua Niugini.

Mista Anderson i bin tok joinim dispela tingting bai soim long ol arapela kantri long wol olsem PNG i gat bikpela tingting long daunim ol paul pasin.



Askim long ol Proposal bilong kisim mani halivim aninit long Piseris Projek Developmen Fan 2011

Nesanel Piseris Atoriti i askim olgeta atisenal o liklik pisamanmeri, ol pis fama na ol koporetiv sosaiti husat i wok mekim piseris developmen wok long givim ol Projek Developmen Fan (PDF) proposal bilong 2011 halivim mani. I gat tupela rot bilong kisim ol PDF mani i stap;

Kategori Namba Wan

Dispela mani i kam long Multilateral Piseris Tritis namel long ol Pasifik Ailan kantri na Yunaitet Stets bilong Amerika long kisim ol US pes sain flek sip i go insait long ol Eksklusiv Ekonomik Zon bilong ol Pasifik Ailan kantri. Ol dispela mani i go long wan wan ol Pasifik Ailan Kantri na Forum Piseris Ejensi (FFA) long Honiara, Solomon Ailans.

A. Komyuniti Piseris Program Sapot

Komyuniti Piseris Program, em bilong halivim ol bikpela komyuniti, we bai wok i no bilong kisim pe o winmani long en.

Husat i ken aplai?

- Ol Komyuniti bes piseris asosiesen o koporetiv

Mani bilong:

- Baim ol kapital ikwipmen olsem pising gia, ais bokis na ol maketing wok samting olsem opis ikwipmen, ol samting bilong mekim pis pon, na ol arapela wankain.

Bikpela mak bilong wan wan projek:

- Ten Tausen Kina (K10,000)

Olgeta projek bilong kisim luksave na glasim:

- Tenpela (10) projek tasol bai kisim luksave. Kategori Namba Tu

Namba tu rot bilong kisim mani long Projek Developmen Fan (PDF) i kam long baset bilong NFA yet long halivim ol komyuniti pising projek aninit long piseris developmen sapot program.

B. Smol i go Midium Skel Enteprais Sapot

Mani bilong ol Smol i go Midium Skel Enteprais o wok bisnis husat bai kisim sapot na givim wanpela liklik hap i go long SME insait long piseris sekta, moa yet bilong baim ol kapital samting we bai strongim wok bilong bisnis.

Husat i ken aplai?

- ol smol i go midium kampani we 100% onasip i stap wantaim ol asgles manmeri
- SME we i wok insait long piseris sekta insait long las tripela yia
- SME wantaim 50% ekwiti kontribusen i go long samting ol i laik baim

Mani bilong:

- Baim kapital ikwipmen o masin samting bilong strongim wokmak bilong bisnis.

Bikpela manimak long wan wan projek:

- Twenti tausen kina (K20,000)

Olgeta projek bilong kisim luksave na glasim:

- Tenpela (10) projek bai kisim luksave.

Ol Jeneral Kondisen:

- Olgeta kapitel samting bai mas gat wanpela involv i kam long saplaia.
- I mas gat evidens bilong ekwiti kontribusen long sait bilong SME Sapot.
- Komitmen na strong bilong givim ol ripot bilong wok na pinis bilong wok long projek we mani halivim i go long en.
- Ol apliken i winim luksave i gat 28 de we bai ol i kisim tok orait bilong mani, na ol i mas yusim.
- Peimen bilong ol samting em PDF Staring Komiti bai sallm i go stret long saplaia.
- Mani em i no bilong ol operesenal kos, bekim dinau o givim dinau.
- Olgeta aplikesen husat i no winim luksave bai go bek long ol apliken.
- Apropriat Aplikesen bilong proposal em i Project Identification Document (PID), Project Formulation Document Form (PFD). Sekim Provinsal Piseris Opis o NFA bilong kisim olgeta dispela pepa.

Long mekim mani i stap ples klia moa long ol piseris projek i ken kisim, wanpela PDF Staring Komiti i kamap pinis long menesim PDF bilong Papua Niugini. Komiti bai lukim ol mani em ol i yusim bihainim klia pasin na inap long glasim bihainim mani ol i yusim.


"PDF" i mas stap ples klia antap long olgeta proposal na i mas go stret long PDF Steering Committee, C/- National Fisheries Authority PO Box 2016, PORT MORESBY, National Capital District.

Olgeta proposal na askim long PDF i mas go long **Mis Welete Wararu**, Eksekutiv Menesa, Provinsal Sapot na Indastri Developmen o yu ken ringim em long telepon namba: 309 0444 o 309 0843.

Olgeta submisin i mas kam pastaim long 30 Desemba, 2010.

Tok Orait i kam long:

SYLVESTER B. POKAJAM
Menesing Dairekta



Jada 2010

Gavman mas sem long dai bilong Westen provins

BIKPELA sem tru long harim olsem klostu 300 manmeri na pikinini i dai pinis long Westen provins long sik kolera taim provins bilong ol i save mekim planti milien kina tru long Ok Tedi Maining.

Westen provins i asples tru bilong Ok Tedi Maining we kantri i kisim planti milien kina tru long sapatim na ranim kantri tasol bilong wanem as tru na ol pipel long hap i wok long dai long sik kolera taim ol gat planti mani long baim marasin na ol dokta na nes bilong go sevim laip bilong ol manmeri.

Em i tru yumi olgeta pipel i ken askim dispela askim tasol husat tru save holim ol dispela mani kam long Ok Tedi Maining bai bekim dispela askim na tu tokaut long wanem as na ol no mekim wanpela samting. Husat tru bai tokaut long wanem as na nogat gutpela marasin saplai na haus sik sevis bilong Westen provins taim ol save mekim planti milien kina tru na givim long han



bilong Nesenel Gavman na Provinsel Gavman.

Tingim tasol, taim sik kolera bin bruk long Papua Niugini long las yia i kam, hariap tru ol wokmanmeri i mekim wok na daunim hariap we i no kisim na daunim laip bilong planti manmeri olsem nau yumi harim long Westen provins.

Moabeta ol lain long Helt Atoriti long Westen provins na tu long Nesenel Helt Dipatmen mas tokaut klia long wanem as tru na hevi i stap tru long wanem hap.

Yumi save olsem kolera em sik we i kamap long doti wara na kaikai na husat manmeri i kisim ol inap givim go hariap long ol arapela manmeri.

Tasol sapos ol opisa bilong helt o haus sik woka i redi gut long karimaut ol wok bilong ol, ating ol inap long daunim dispela sik long i no inap go bikpela

moa na kisim planti manmeri olsem nau.

Insait long Mosbi siti na ol Sentrel asples olsem Porebada, Abau na arapela, dispela sik kolera i no stap longpela taim tumas.

Sotpela taim tasol na ol manmeri i winim na daunim dispela sik pinis. Wankain tu long ol arapela provins olsem long Madang, Is Sepik, Isten Hailans na arapela moa.

Kisim luksave long ol dispela provins na bihainim wanem kain rot na pasin ol mekim long daunim hariap dispela sik kolera.

Wanem kain wokmanmeri, wanem kain marasin i sambai long dispela hevi na wokabout bilong ol woklain i olsem wanem long pait agensim dispela sik. Ol haus sik na klinik i stap redi olsem wanem?

Westen provins em ol no inap long painim mani long mekim dispela wok na ol samting bikos ol gat olgeta mani i stap pinis long mekim olgeta wok ya i go isi na isi tru. Sapos dispela sik i go in-

sait long maining eria bai yum tok wanem long dispela? Bai maining i pasim wok o nogat?

Ol wokmanmeri bai ronawe nabaut o nogat? Turangu ol asples em hat long ronawe bikos as graun tru bilong ol na ol bai stap wantaim dispela hevi na sik. Maski sik i winim ol, ol bai stap yet inap ol winim dispela wik.

I no gutpela ripot o nius tru long harim dispela sik i daunim ol turangu pipel bilong yumi long Westen provins.

Dispela i soim olsem Gavman i no kea long laip na sindaun bilong ol manmeri moa. Em laikim bisnis na mani tasol na hevi tru bilong ol pipel em i no ting tumas.

Gavana bilong Westen provins Dokta Bob Danaya mas tokaut klia nau. Maski long toktok tumas long bisnis na politiks. Tokaut stret long asua i stap we na husat mas karim dispela hevi na mekim wok bilong em.



KOMENTRI

Kristen pasin, bilip na politiks

PLANTI taim, dispela tripela samting i save senis.

Taim lida i stap long ai bilong pablik, em i save traim soim stret kristen pasin bilong em. Long wanem, dispela em i wanpela bikpela samting we i mas stap long as bilong olgeta wok lida.

Sapos yu lida man, na ol pipel i lukim olsem yu wanpela strongpela kristen, na bilip man, dispela i soim ol long ples klia, olsem lida em i gat gutpela bel.

Tasol olsem wanem, sapos lida i save soim tasol dispela pasin long ai bilong planti ol arapela, na em i nogat bilip?

Dispela wik, mipela i lukim moa senis i kamap long ol lida wok insait long gavman na kantri.

I luk olsem lida bilong kantri i no moa gat inap bilip long namba tu man husat em i makim em bipo.

Sapos ol lida bilong yumi i gat gutpela bel, kristen pasin, na inap bilip long luksave olsem pasin nogut i noken kamap bikpela, ating bai yumi lukim planti moa gutpela i kamap long kantri.

Planti manmeri nau i tok olsem dispela bilip long woksava, na wok bihainim gutpela tingting na bel, i nogat moa namel long ol lida bilong yumi.

Senis namel long ol bikpela ministri bilong gavman, i nau soim olsem bilip bilong namba wan bikpela pati, long ol wokman bilong em, i no strong olsem bipo.

Mipela i autim wanpela stori dispela wik, we i sut long kantri bilong yumi, PNG, we oltaim, yumi save tok em i wanpela kristen kantri.

I tru yumi wanpela kristen kantri, tasol aninit long mama loa bilong yumi yet, i nogat wanpela banis i stap long pasim ol arapela kain lotu i kam insait long kantri bilong yumi.

Dispela tingting em i kamaut bikpela dispela wik, long wanem, pasin bilong yumi PNG i save sanap strong tru long pasin bilong bilip, na pasin bilong gutpela pasin na tingting.

Em i wankain pasin ol tumbuna bilong yumi i bin bihainim long stiaim gut ol komyuniti bilong ol.

PNG bai no inap long tok olsem em i wanpela tru tru kristen kantri, sapos bilip bilong ol lida bilong em i stap olsem pen bilong bilasim pes long taim bilong singsing tasol.

Pasin na tingting bilong ol manmeri bilong yumi, em i save bihainim ol pasin na tingting bilong ol lida.

Ol lida i mas luksave long dispela, na mekim stretpela pasin bai gutpela tingting i ken kamap strong moa.

Sapos bilip i no strong, kristen pasin bai pundaun.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

| | |
|-----------------------|-------------|
| Ples: | Air: |
| PNG | K220.00 |
| AUSTRALIA | US\$110.00 |
| ASIA PACIFIC na JAPAN | US\$150.00 |
| AMERICA na EUROPE | US\$210.00 |

General Manager Elizabeth Konga

Editor Neville Choi

Published at Section 58, Allotment 3 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

INO PILIM SEIF? TOK NOGAT Kamdaun na go



Rot sefti em bikpela hevi long PNG wantaim planti birua long rot we i lukim planti lain i dai. Sapos yu no pilim seif olsem wanpela pasindia – tok nogat, kamdaun long PMV na go.

Sapos draiva i dring, spit tumas, i no lukluk gut long ol manmeri wokabaut long rot o pulapim PMV, yu gat rait long tok nogat long dispela, go daun long PMV na go. Yu ken sevim laip bilong yu o laip bilong narapela. Em taim nau long tingting strong long ROT SEFTI – em i no wanpela PILAI....



- TOK NOGAT LONG**
- DRING NA DRAIV
 - SPIT TUMAS
 - I NO LUKLUK LONG MANMERI LONG ROT
 - PULAPIM TUMAS PMV

**ROT SEFTI
em ino wanpela
PILAI**

A road safety initiative by Motor Vehicle Insurance Ltd



TAIM BILONG TAITWARA BIRUA: TAIM bilong ren, em i no gutpela taim oltaim. Tude, yumi lukim planti ren i pun-daun, na kamapim ol bikpela birua olsem taitwara long planti hap. Hia taitwara i karamapim graun raunim wanpela hap kona long taun bilong Wee Waa, long Noten Nu Saut Wels dispela wik.



KISIM POTO LONG STRAWBERRY FIELDS: STORI bilong ples i ken pulim planti. Wanpela ples olsem, em Strawberry Fields, we i stap long Sentral pak insait long Nu Yok Siti. Dispela naispela piksa ol i mekim long kain kain liklik ston, i stap long makim biknem musik man John Lennon, husat i bin stap silip long ol rum slip klostu taim ol i bin kilim em long 1980. Ol dispela lain turis manmeri i kam long kisim poto long dispela ples.



WEL ABUS BUNGIM HEVI: TAIM bilong haiwara, em i taim bilong birua bi-long olgeta. Man na ol enimal tu. Ol dispela wel sikau o kangaroo em dispela man i painim ol na halivim ol long go painim graun i no stap aninit long haiwara long Lek Burrendong klostu long Wellington long westen sait bilong Nu Saut Wels, Australia.

BIKNEM US MERI OPRAH KAM LUKIM AUSTRALIA: BIKNEM televisen so meri bilong Amerika, Oprah Winfrey, nau i stap pinis long Australia long mekim wanpela so bilong em long hap. Long dispela poto, em i holim pasim Elvis, wanpela koala i save stap long Hamilton Island Wildlife Pak long Disemba 8, 2010.

RACE INTO ORIGIN THIS CHRISTMAS

Give your family the best Christmas dinner ever with these super savings on clean, healthy, smokefree gas cooking appliances

FREE IGNITOR WITH EVERY PURCHASE

OPENING HOURS
Monday to Friday
8:30am – 4:30pm

SALE ENDS 12:00pm 24TH DECEMBER 2010

Rambo Country Cooker
MODEL GB-OILP
K112.00
• Cast Iron
• Single
• Includes hose/regulator and 4.5kg Cylinder

Rambo 3 Burner CI Cooker
GB-03LP
K152.30
• Includes hose/regulator and 4.5kg Cylinder

Rinnai Instantaneous Water Heater
5.5 Litre REU.55RT
K1071.00
• Includes installation & materials

Auscrown 1 Burner
MODEL CK-107LP
K198.00
• Includes hose/regulator and 4.5kg Cylinder
• Stainless Steel
• Single

Auscrown MP Ring Burner
HPA-100 LP GAS
K231.00
• Includes hose/regulator and 4.5kg Cylinder

Sale on at these Origin locations only:
Port Moresby Ph 323-4033, Lae Ph 472-3177 and Rabaul Ph 982 1177
* All package prices are GST Exclusive

origin
gas does it!
Together we can make a difference.™



Program bilong Wanwan De

Mande - Fraide

6am - 10am - Sankamap show - Host: KAS.T
 6:15am - Komuniti Notis Bod
 6:30am - Nius Hetlains / Bondei grittings
 Trukai Rais - GES FAIA KOMPETISEN
 6:45am - Niuspepa Hetlains
 7:00am - Major Nius Bulletin - YUMIFM Nius Senta
 7:15am - Toktok sapolim LO na JASTIS Sekta
 7:30am - Trukai Rais - GES FAIA KOMPETISEN
 8:00am - Major Nius Bulletin - YUMIFM Nius Senta
 8:15am - Stori b'long Skelim Tingting
 8:30am - Trukai Rais - GES FAIA KOMPETISEN
 9:00am - Nius Bulletin - YUMIFM Nius Senta
 9:15am - Luksave long Komuniti (Redio Pilai)
 9:30am - Trukai Rais - GES FAIA KOMPETISEN

9:45am - YUMI PAINIM WOK Segment
 10:00am - Nius - YUMIFM Nius Senta
 10am - 2pm - Monin Trek na Belo Pack - Host: VAVIESSIE
 10:10am - Lukatim yu yet - Helt toktok - RH Hyper Mart
 10:45am - YUMI PAINIM WOK Segment
 11:00am - Nius - YUMIFM Nius Senta
 11:10am - Cont'd - Lukauti yu yet - Helt toktok
 11:30am - Nius Hetlains b'long Belo Taim
 12:00pm - Major Nius Bulletin - YUMIFM Nius Senta
 12:10pm - BELO Taim - wantaim sapot b'long TELIKOM
 12:15pm - Komuniti Notis Bod
 12:20pm - BELO Taim - wantaim sapot b'long TELIKOM
 1:00pm - Nius - YUMIFM Nius Senta
 1:10pm - BELO Taim - wantaim sapot b'long TELIKOM
 2:00pm - Major Nius Bulletin - YUMIFM Nius Senta
 2pm - 6pm - Avinun Draiv Taim - Host: Enjo Dabix
 2:00pm - 4:00pm (Tunde/ i Fonde) TOKAUT TOKSTRET
 2:45pm - YUMI PAINIM WOK Segment
 3:00pm - Nius - YUMIFM Nius Senta

3:10pm - Avinun cruz
 4:00pm - NIUS - YUMIFM Senta
 4:10pm - "FOAPELA KAM GUD LONG 4"
 4:30pm - Nius Hetlains
 4:45pm - YUMI PANIM WOK Segment
 5:00pm - MAJOR NIUS BULLETIN - YUMIFM Nius Senta
 5:10pm - 6:00pm - FLAME KULCHA (1 hr) listeners request
 6:00pm - MAJOR NIUS BULLETIN - YUMIFM Nius Senta
 6 - 7pm - Maggi noodles request aua
 6pm - 00am - NAIT BEAT - Host: ANGRA KENNEDY
 6:10pm - 7:00pm Mun kamap sho
 6:45pm - Komuniti Notis Bod
 7:00pm - 9:00pm - COCA COLA GARAMUT
 9:00pm - 00am - Nait Beat - Isi Cruz long nait
 00am - 6am - BRUKIM TULAIT SHOW - Host: Papa Raegs / Sally / Nenge
 00:00 - Early Monin Taim Cruz (ol lain brukim tulait shift)
 - Miusik / Request / Tok pilai
 - Kipim Kampani long ol nait shift.

Weekend Shift - Saturday & Sunday
 6:00am - 11:00am - Wiken Sanrais
 6:30am - Komuniti Notis Bod - Bondei grittings
 7am - 9am - Wiken Spots
 9am - 11am - Monin Raun
 11am - 1pm - National Weekly Hit Parade (Host Kas.T)
 2pm - 6pm - Sarere Avinun Draiv
 6pm - 00am - Nait Beat (Host Angra Kennedy)

YUMIFM POROMAN TEAM:
 Turner (KAS.T) Arifeae - Team Leader / Program Director
 Angra KENNEDY - Senior Announcer
 Sinimil (Vaviessie) Philipo - Promotions Co ordinator
 Papa Raegs - Announcer Nenge Neings - Announcer
 Enjo Dabix - Announcer Selestine Sally Sino - Announcer

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Spots
 7.30PM Nius na Karen Afeas
 8PM Helt
 8.15PM Musik
 8.30PM NIUS
 8.40PM Spots Riplei
 8.55PM Musik
 9PM Stesen Pas

TUNDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afeas
 8PM Mama Graun
 8.15PM Musik/Spots
 8.30PM NIUS
 8.40PM Helt Riplei
 8.55PM Musik
 9PM Stesen Pas

TRINDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afeas
 8PM Focus
 8.15PM Musik/Spots
 8.30PM NIUS
 8.40PM Mama Graun Riplei
 8.55PM Musik
 9PM Stesen Pas

FONDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afeas
 8PM Youth
 8.15PM Musik/Spots
 8.30PM NIUS
 8.40PM Focus Riplei
 8.55PM Musik
 9PM Stesen Pas

FRAIDE - Moning - Nait
 6AM Stesen Op - Nius Hetlain - Musik na ol intaviu
 6.30AM Nius na Karent Afes
 7AM Stesen Pas
 7PM Stesen Op
 7.01PM Ol Hetlain na Program Priviu
 7.15PM Musik na Chit-Chat
 7.30PM Nius na Karen Afeas
 8PM Wantok
 8.15PM Musik
 8.30PM NIUS
 8.40PM Youth Riplei
 8.55PM Musik
 9PM Stesen Pas

SARERE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Wantok
 8PM Lokal Ben
 8.30PM Nius
 8.40PM Musik/Chit Chat
 9PM Stesen Pas

SANDE - Nait
 7PM Stesen op - Ol Nius Hetlain/Program Priviu
 7.05PM Musik na Chit Chat
 7.30PM Nius
 7.40PM Femili Blong Serah (Redio Plei)
 8PM Lukluk Bek Long Wik
 8.30PM Nius
 8.40PM Musik/Chit Chat
 9PM Stesen Pas

Raun wantaim Wantok kru ...

Nek bilong Nu Ailan na Sentral winim karioki resis



Nicky Bernard i raitim

WANPELA yangpela meri bilong Nu Ailan na Sentral i winim K12,000 win mani long nek bilong em tasol.

Natalia Maino, husat i tanim 19-pela krismas long Tunde tupela wik i go pinis i kisim gutpela presen bilong em long amamasim bonde bilong em, dispela resis long traim nek i bin kamap long Ozzies Bar long Ela Beach Hotel long Pot Mosbi.

Moa long 30 yangpela manmeri bin resis long dispela kompetisen, we i bin stat long sampela mun i go pinis na bin kamap long

Trinde olgeta wik. Natalia wantaim narapela faivpela i bin go insait long gren fainol, bihain long olgeta singsing ol jas i makim olsem nek bilong Natalia i bin kamap tru.

Natalia i tok, dispela nait em bin guria liklik long wanem planti manmeri i bin stap long dispela nait, tasol em save olsem nek bilong em i no bin bagarap na em save olsem planti manmeri bai putim ai long em.

Menesa bilong Natalia em mama bilong em, taim Wantok i askim em long nek bilong Natalia, em i tok, "pikinini meri bilong mi, em meri bilong sings-

ing, taim dispela resis i kamap em tokim mi em laik traim resis, olsem na mi bihainim laik bilong em tasol na taim em win bikpela amamas bin kisim mi".

Natalia i bin resis long XOX PNG Idol we i save kamap long Lamana olgeta Sarere, em tu i stap insait long fainol 10-pela manmeri, tasol dispela taim ating nek bilong em mas bagarap liklik long Trinde olsem na em no mekim go tru.

Putim was tasol na harim nogat dispela hap kas yangpela meri Nu Ailan na Sentral ya bai singsing long wanpela bikpela ben insait long kantri bilong yumi.

Rep mangi...



REP MANGI: Freeman Kakas i gat six(6)pela krismas tasol, em save long olgeta rep singsing bilong wanem kain singa long wol, long piksa em singim wanpela rep singsing long wanpela fanrasing bilong bikpela susa bilong Nakiisha Kakas, bikpela susa bilong em i wok long raisim mani bilong Papau Niugini Children's Fund. Freeman Kakas i ken singim wanem kain rep singsing yu laikim, em wantaim tupela bikpela brata bilong em gat liklik grup bilong ol, na ol save prektis long haus bilong ol long 5mile.

Poto na stori: Nicky Bernard

EMTV Television Guide

| FONDE, DISEMBA 9 2010 | | FRAIDE, DISEMBA 10 2010 | | SARERE, DISEMBA 11 2010 | | SANDE, DISEMBA 12 2010 | | MANDE, DISEMBA 13 2010 | |
|-----------------------|---|-------------------------|---|---|--------------------------------|-------------------------------|--------------------------------|------------------------|--------------------------------|
| 4.59AM | STATION OPEN | 7.30PM | G RAIT MUSIK | 5.00PM | G HOT SOURCE | 9.29AM | STATION OPEN | 6.30AM | G IT IS WRITTEN: |
| 5.00AM | G JOYCE MEYER Religious program | 8.30PM | PG ELITE MUSIC ZONE | 5.29PM | G EMTV NEWS UPDATE | 9.30AM | TEST CRICKET: | 7.00AM | G HILLSONG |
| 5.30AM | G TODAY | 9.00PM | G DIGICEL STARS | 5.55PM | CRIME STOPPERS | AUSTRALIA v ENGLAND | | 7.30AM | AUSTRALIA NETWORK |
| 9.00AM | EMTV PRIME TIME LINEUP | 10.00PM | PG BROTHERS & SISTERS | 6.00PM | G NATIONAL EMTV NEWS | Hobart, Tasmania. | | 11.59PM | STATION RE-OPEN |
| 9.30AM | TEST CRICKET: | 10.30PM | NATIONAL EMTV NEWS REPLAY | 6.30PM | G A CURRENT AFFAIR | 12.NOON G THE RACING YEARS | | 12.00PM | G WIDE WORLD OF SPORTS |
| AUSTRALIA v ENGLAND | | 11.00PM | AUSTRALIA NETWORK | 7.00PM | G IN MORESBY TONIGHT | 12.30PM G AUSTRALIA v ENGLAND | | 5.30PM | G TWENTY/20 ALL STARS |
| Hobart, Tasmania. | |continue.... | | 7.27PM | EMTV TOK SAVE | ...continue... | | 6.00PM | G NATIONAL EMTV NEWS |
| 12.NOON | G THE RACING YEARS | FRAIDE, DISEMBA 10 2010 | | 7.30PM | PG THE BLOCK | 5.00PM | PG THE RACING YEARS | 6.30PM | G DIGICEL STARS |
| 12.30PM | G AUSTRALIA v ENGLAND | 4.59AM | STATION OPEN | 8.30PM | PG SECRET MILLIONAIRE | 5.30PM | G MXTV | 7.30PM | G TWENTY/20 ALL STARS |
|continue.... | | 5.00AM | G JOYCE MEYER: Enjoying Every Day Life | Queensland mining magnate Peter Bond undergoes a reality check about the importance of family and support when he goes undercover to work with some of Australia's poorest and most disadvantaged people. | | 6.00PM | G NATIONAL EMTV NEWS |continue.... | |
| 4.57PM | G EMTV TOK SAVE | 5.30AM | TODAY | 9.30PM | PG RPA | 6.30PM | G FOUR NATIONS(Live) | 9.30PM | M SUNDAY NIGHT MOVIE: |
| 5.00PM | G HOT SOURCE | 9.00AM | EMTV PRIME TIME LINEUP | 10.30PM | PG POTRAITS OF A NATION | 8.27PM | EMTV TOK SAVE | 10.30PM | G HILLSONG |
| 5.29PM | G EMTV NEWS UPDATE | 9.30AM | TEST CRICKET: | 11.00PM | G NATIONAL EMTV NEWS REPLAY | 8.30PM | G MORESBY TONIGHT | 11.00PM | G NATIONAL EMTV NEWS REPLAY |
| 5.30PM | G WHO WANTS TO BE A MILLIONAIRE - HOT SEAT | AUSTRALIA v ENGLAND | | Hobart, Tasmania. | | 9.00PM | PG WWE AFTERBURN | 11.30PM | Australia Network |
| 6.00PM | G NATIONAL EMTV NEWS | 12.NOON | G THE RACING YEARS | 11.20PM AUSTRALIA NETWORK | | 10.00PM | PG THE KING OF QUEENS | | |
| 6.30PM | G A CURRENT AFFAIR | 12.30PM | G AUSTRALIA v ENGLAND |continue.... | | 11.30PM | G NATIONAL EMTV NEWS REPLAY | | |
| 7.00PM | G SPORTS SCENE |continue.... | | SARERE, DISEMBA 11 2010 | | 12.00AM Australia Network | | | |
| 7.27PM | G EMTV TOK SAVE | 4.57PM | G EMTV TOK SAVE |continue.... | | SANDE, DISEMBA 12 2010 | | 4.59AM | STATION OPEN |
| | | | |continue.... | | 6.29AM STATION OPEN | | 5.00AM | G JOYCE MEYER |
| | | | |continue.... | | | | 5.30AM | G TODAY |

TORO



BIABIA



KANAGE



TOKWIN

Gate kres tasol kisim Awod

Sampela lain bilong Media i go gate kres tasol long media awod, tai mol gate lain askim sampela tok kampani bilong ol i no baim ticket bilong tasol ol tu stap long resis long kisim awod o luksave. Nogat tebol bilong ol tasol taim ol kolim ol awod dispela ol lain nogat tebol i kisim awod long ol manmeri sindaun long tebol. Planti wina ting bai ol kisim sampela evelope tu, tasol han bilong

ol i holim tasol setfiket pepa na liklik trofi bilong luksave, ating nogat sponsor bilong wanwan ya. Tokwin tasol.

Kainkain samting bai kam long dispela Krismas

Taim bilong Krismas nau, planti fameli bai go long ples bilong long kisim malolo na amamasim krismas bilong ol Krismas em taim wei yumi ol-geta save lukluk go pas long en, tasol sampela bilong yumi, lukluk bilong yumi i no save go na

save pinis gut, lukluk save go na sot long nem bipo long de bilong krismas. Tingim tasol, krismas em taim bilong yumi long tingim bonde bilong Jesus, na em taim we bai yumi fameli bung na amamasim dispela de na tu lotu long em. Krismas i no bilong yumi long painim biruwa na stap long wari taim de bilong krismas kam, planti bilong yumi save painim biruwa na krismas bilong fameli save bagarap.

Tokwin Tasol...

Grid for a word search puzzle. The grid contains letters arranged in 10 rows and 15 columns.

Painim ol dispela nem bilong kain kain kar na motobalk:

Table listing car models and brands: TOYOTA (SPRINTER), MAZDA (HINO), NISSAN (MACK), MITSUBISHI (VOLKSWAGON), VANETTE (KIA), MERCEDES (FLUSO), KIA (KIANG), HONDA (KAWASAKI), SUZUKI (SUBARU), FORD (BRAVO), AUDI.

Grid for a 10x10 logic puzzle. Numbers are placed in some cells to indicate the length of words starting from those cells.

Grid for a 10x10 logic puzzle. Numbers are placed in some cells to indicate the length of words starting from those cells.

Ansa bilong las wik Sudoku

Ansa bilong las wik Pasol

Grid for a crossword puzzle. Some letters are already filled in, and others are blank.

EMTV Television Guide

Large table listing television programs, channels, and times for EMTV. Columns include time, program name, channel, and category.

Ol Progam na Taim i ken senis...

Betde bilong Empera Akihito na Nesenel De bilong Japan

JAMES KILA i raitim

TUDE ol sampela lain manmeri bilong kantri Japan husat i stap long Mosbi na tu ol narapela hap long wol bai makim na selebretim Betde bilong Empera bilong Japan, Empera Akihito.

Empera bilong Japan em bikpela man husat i makim tumbuna kalsa bilong Japan na tu em i stap olsem het bilong Stet na kantri.

Long Mosbi long tude (Fonde) Embesi bilong Japan bai holim liklik bung long haus bilong embeseda long Mosbi long makim dispela de.

Hia Wantok Niuspepa i bungim wanpela stori bilong dispela de na sotpela laip stori bilong Empera Akihito na Emperes Michiko.

Long Janueri 7 1989 bihain long narapela Empera bilong Japan, Hirohito i bin dai, narapela i kisim ples bilong em. Na dispela em Empera Akihito na em i kamap olsem 125th Empera bilong Japan. Wanpela bikpela seremoni i bin kamap long Tokyo long Imperial Pales long Novemba 12 1990 we i lukim Empera Akihito i kisim sia olsem Empera bilong Japan. Dispela seremoni i lukim planti tausen ol bikman meri na het bilong ol 158 kantri na ol intanesenel ogenaissen long wol i bin go long seremoni.

Insait long mama lo o Kontitusen bilong Japan, Empera em "mak o sain bilong Stet na em i stap long bungim olgeta pipel wantaim" na em i kisim posisen bilong em long "pasin wanbel ol pipel i gat long en na i givim pawa long em"

Mama i bin karim Empera Akihito long Tokyo long Desemba 23, 1933, na long dispela taim bikpela amamas tru i bin kamap insait long kantri Japan olsem nambawan pikinini bilong Empera Showa na Empres Kojun i bin kamap. Empera Akihito i gat 4-pela bikpela susa na wanpela liklik brata na wanpela liklik susa.

Empera Akihito i bin go long elementari skul na sekendari skul long Gakushuin, em Imperial haus skul we bihain i bin kamap olsem praivet skul. Long taim bilong woa, ol i muvim em wantaim ol wan skul bilong em i go long kantri sait long Nikko. Em i bin stap yet long Nikko i go inap woa i kamap na pinis long 1945.

Long 1952, em i go skul ong Gakushuin Yunivesiti long stadi long Politikal Sains na Ikonomiks. Long dispela yia yet wanpela seremoni i kamap na ol i makim em olsem Kraun Prins. Stat long dispela taim em i karimaut wok o duti bilong em olsem Kraun Prins. Wanpela yia bihain, em i mekim namba wan ovasis raun bilong em i go long Inglen we em i lukim Kwin Elizabeth i kisim taitel olsem Kwin bilong Yunaited Kingdom. Prins i bin raun i go long planti hap bilong Not Amerika na Yurop. Long 1956 em i pinisim skul bilong em. Tasol bihain long dispela em i gohet long kisim ol spesel skul em ol atoriti long Japan i givim long em long sait bilong Histori bilong Japan, Konstitusinal Lo na ol



Empera Akihito wantaim Emperes Michiko i sanap long gaden

Empera Akihito i planim rais long pales gaden. Rais em tumbuna kaikai bilong Japan.



Empera Akihito wantaim Emperes i bung wantaim femili bilong ol.



narapela moa skul.

Long Epril 10, 1959, Kraun Prins Akihito i maritim Michiko Shoda, pikinini meri bilong wanpela bikpela bisnisman bilong Japan nem bilong em Dokta Shinzo Koizumi. Dispela bikman i save helpim Kraun Prins Akihito long edukesin bilong em planti yia. Em ya i tok bihain olsem:

"Kraun Prins yet i makim pikinini meri olsem na mipela i givim tasol." Imperial Haus Lo na Imperial Haus Kaunsil i wanbel long tingting bilong yangpela man ya na i tok orait long tupela i maritim.

Japan i amamas long maritim bilong dispela tupela man na meri na moa long 500,000 pipel i bung long strit long ama-

masim dispela maritim bilong tupela. Dispela em wanpela bikpela de bilong amamas tru long histori bilong Japan bihain long woa.

Kraun Prins Akihito wantaim gutpela sapot bilong Kraun Prinses Michiko i gohet long mekim ol ofisal duti na tu i holim strong kastom na pasin we Imperial Haus i laikim.

Empera Akihito na Empres Michiko i save kamapim planti ol seremoni long Imperial Pales we i save bungim ol planti kain kain ol pipel na ol lida bilong wol. Ol i save mekim planti wok o duti we i lukluk long nid bilong ol pipel na wanem helpim ol pipel i laikim.

Long Imperial Pales, dispeal tupela Mejesti i save kamapim planti handret seremoni, we ol pipel i save bung, ol save redim ti, belo kaikai na apinun kaikai planti taim insait long yia. Long dispela ol tai mol save bungim bikpela namba manmeri tru.

Empres Michiko em mama i karim em long Tokyo long Oktoba 20 1934 na em namba wan pikinini meri bilong Hidesabura na Fumiko Soda. Dispela Soda femili e mol bikpela bisnis lain long indastri na tu ol i save holim bikpela wok long skul na tupela lain femili memba i holim posisen bilong kalsa.

Taim ol pipel bilong Japan i harim olsem Kraun Prins i gat laik tru long maritim yangpela meri Ms Soda, ol i amamas tru.

Empres Michiko i bin skul long Futaba Elementari skul. Em i lusim skul long gret 4 taim Wol Woa 2 i bin kamap.

Tasol em i go bek long skul taim woa i pinis na i greduet long Sakred Hat Hai Skul, em wanpela Katolik Skul long Tokyo. Em i bin skul long Inglis Literetsa long Sakred Hat Yunivesiti. Planti ol wan skul bilong Empres Michiko i tingim gutpela pasin bilong dispela yangpela meri long helpim na serim tingting bilong em long skul. Em i bin greduet long 1957.

Olsem Kraun Prinses, bihain long em i maritim Prins Akihito em i mekim planti gutpela wok long Royal femili na i helpim long bringim helpim long planti komyuniti long Japan insait wok raun bilong em.

Empera Akihito na Empres Michiko i gat tripela pikinini em Prins Naruhito, Prins Fumihito na Prinses Sayako. Ol save laikim ol pikinini bilong ol i stap klostu long ol.

Empres Michiko yet i givim susu bilong em long olgeta pikinini bilong em inap taim ol pikinini i go long skul. Em save redim kaikai bilong ol olgeta moning na em i save laikim ol tru.

Dispela tupela maritim em Empera Akihito na Emperes Michiko em bikpela mak tru bilong Japan kalsa na pipel.

Olsem na yumi long Papua Niugini i tok amamas long Japan long gutpela pasin bilong wok bung wantaim na tu long planti teknikal helpim na sapot PNG save kisim long Japan.

Krismas long Mosbi i senis gen

Nicky Bernard i raitim

BIKPELA siti bilong yumi o ol save tok ples bilong yumi olgeta bai lukim Krismas bilong em bai senis liklik, long wanem eksen gavana bilong NCD, Powes Parkop, i traim long bringim olgeta manmeri na pikinini long kam ausait long banis bilong haus bilong ol na amamasim Krismas wantaim long nait.

Tupela yia i go pinis, Gavana Parkop i statim dispela wok long bring ol pipel bilong NCD long kam ausait long banis bilong ol na amamasim krismas na nu yia. Em bikos ol pipel bilong NCD save lok insait long banis long haus bilong ol long amamasim krismas na nupela yia long wanem ol save pret long ol bikhet man long bagarapim ol.

Gavana Parkop i laikim tru ol manmeri na pikinini long amamasim Krismas bilong ol gut olsem bipo long 1970s, 1980s, dispela taim yu ken amamas gut tru, yu ken kisim famili bilong kam ausait long banis bilong yu o wokabaut long rot na amamas, nogat trabol bai painim yu o skin bilong yu bai no inap pret.

Pot Mosbi i senis long eli 1990s dispela taim nau Mosbi i wok long go bikpela, kainkain haus bisnis i wok long kamap, kainkain haus slip i wok long kamap, setolmen i wok long kamap long olgeta hap kona long Mosbi, dispela i bagarapim Mosbi long wanem raskol pasin i wok groa wantaim dispela bikpela siti bilong yumi.

Mosbi em wanpela hap we ol wait manmeri save kisim ol famili bilong ol na go lukim piksa long bikpela skrin, o bikpela timba ol mekim na penim go wait na ol save soim ol piksa long en we yu sanap long wanem kona bai yu stil lukim piksa yet, dispela kain ol piksa save pulim ol manmeri pikinini i kam aut long haus bilong ol na go bung long lukim piksa, taim piksa pinis ol ken wokabaut isi go long haus bilong long wanem ol pilim olsem skin bilong ol i no pret long ol nogut man o raskol.

Gavana Parkop em bilong Manus, tasol em kam stap long Mosbi taim em yangpela mangi na tu taim Mosbi i liklik yet, em save long gutpela bilong ol yia go pinis na nogut bilong siti bilong yumi, em save long wanem kain amamas yumi ken kisim na wanem kain amamas yumi bai noken kisim.

Gavana Parkop laik kisim dispela amamas em bin stap wantaim long bipo na traim long mekim i kamap gen taim em stap gavana yet, em kirapim dispela bikpela skrin we yu ken kam aut long haus bilong yu na lukim ragbi long taim bilong Stet ov Oriijin, dispela i bin kamap gut tru, ol manmeri na pikinini kam ausait long haus bilong ol baim liklik kaikai bilong ol na kam sindaun tasol long bikpela pilai graun na lukim gem, dispela gavana i



WELKAM: Gavana Parkopna Het Bisopbilong Katolik Sios iopinna blesim ples we ollain long Mosbi ken kam lukim ol stetu bilong Maria ia karim Jisas long Bethlehem. Ol foto: Nicky Bernard



JIRAP BILONG MOSBI: Ol stetu Jirap sanap long 5-mail pilai graun long Mosbi.



SOIM KRISMAS: Ol stetu bilong Mama Maria wantaim Jisas, ensel, Joseph wantaim ol animol.

mekim long olgeta hap kona bilong Mosbi siti.

Krismas amamas em i statim tupela yia go pinis na em wok long gro hariap tru, em statim long 5-mail long Jack Pidik park, bihain em kisim go long Gordons long Hunagi pilai graun, dispela em go bikpela stap, na long dispela yia em kisim go bek long 5-mail na dispela bikpela na bikpela moa, i gat ol krismas lait em mekim go planti, em kisim ol giaman animal kam putim bilong pikinini long go lukim, em mekim wanpela hap wei ol lotu lain ken go long lotu long krismas long makim bonde bilong bikpela Jisas, em tu mekim bikpela hap we ol ben lain ken go na singsing ol krismas singsing, na tu em putim ol bikpela skrin we yu sanap long wanem hap kona bai yu ken lukim ol pilai o singsing long dispela bikpela stes yet.

Krismas amamas em bikpela tru long yumi PNG, taim krismas i kam klostu bai yu stat long stret yu na famili bilong yu, sapos yu gat mani o yu malolo bai laik go krismas long ples bilong yu yet, sapos nogat bai yu stap tasol,

krismas tu em bikpela samting long yumi ol lotu lain, dispela taim bai yumi ting bon bilong Jesus, em bon na bihain em baim bek sin bilong yumi, dispela bilip em stap long yumi olgeta.

Hamas moa de na krismas de bai kamap, ol pipel long bikpela siti Mosbi i statim amamas long de wan bilong dispela na bai pinis long de namba 23 long dispela Mun, planti manmeri na pikinini save go long 5-mail long apinun yet na wetim tasol bilong ol lait long kam on na wet tasol ol lain bilong kam singsing, dispela pak long 5 mail save pulim ol famili long Gerehu, Hohola, Kone, 9-mail, Gordon, Tokara, 3, 2-mail na sampela liklik hap moa long kam na lukim lait na singsing na bung wantaim ol narapela.

Bikpela tingting bilong Gavana Parkop long kisim olupela taim bilong Mosbi siti kam bek, yumi olgeta mas amamasim krismas wantaim, na tu yumi olgeta mas save long mining bilong krismas, em sapos yumi save long mining bilong krismas, yumi ken sikan long narapela barata susa na tokim ol olsem HEPI KRISMAS.



TEKOVA LONG PAPA: Pikinini meri bilong Gavana Parkop i putim star antaploug diwai krismas long opim krismas long 5-mail.

Raun wantaim Kanage olgeta wik

Mangi Sepik ya!

KANAGE i save wok long Ambunti Los long Is Sepik provins. Wok bilong Kanage em long karim ol turis raun long moto kanu long wara Sepik.

Wanpela taim, em i go daun long Angoram Hotel na kisim sampela turis i go antap long Ambunti Los. Mangi Sepik wara ya, olsem na em i no isi, boi pinisim spit bilong moto. Ol i go kamap klostu long Ambunti na




wanpela turis askim Kanage long tok inglis olsem, "Hey, how far is it from Angoram to Ambunti?" Kanage harim na kirap tokim em, "Masta, yu just bow the point and you will see the haus kapa lighting!" Turis ya na tok, "Are you stupid?" Kanage smail na tok, "Yesa, masta. Mi

bilang Sepik stret ya. Bai yu save olsem wanem."

Dams H Robin
Passam

Ol skwat!

Salim ol gutpela Kanage tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: atolire@wantok.com.pg



NEM: Lopecii Loapa

KRISMAS: 17(man)

ADRES: PNG Bible Church, P.O Box 363, Mendi, S.H.P

SAVE LAIKIM: Pilai volibol, harim musik.

NEM: Ronda Elmale

KRISMAS: 20 (meri)

ADRES: Pes Catholic Mission, P.O.Box 179, Aitape Sandaun Provins

SAVE LAIKIM: Go lotu, mekim pani, lukim TV na mekim pen pal

NEM: Mariatha Seilupe

KRISMAS: 27 (meri)

ADRES: Pes Catholic Mission, P.O Box, 179 Aitape, Sandaun provins

SAVE LAIKIM: Mekim pani, go lotu, pilai soka na volibol, harim musik na lukim TV

NEM: Ronald Wama

KRISMAS: 25 (man)

ADRES: C/-B.E.F, P.O.Box 84, Maprik, E.S.P

SAVE LAIKIM: Kompyuta study, Accounting study, Economics stadi, pilai spot, mekim pren na go lotu.

NEM: Karl Giri

KRISMAS: 36 (man)

ADRES: Semoroks Gospel Club, P.O.Box 3368, Lae, Morobe Provins

SAVE LAIKIM: pilai lid gita, komposim na singsing long God, painim meri lotu long helpim long singsing.

NEM: Mary -Grace Walete

KRISMAS: 19 (meri)

ADRES: Pes Primary School, P.O.Box 36, Aitape, Sandaun Provins

SAVE LAIKIM: lukim TV, harim musik, go lotu, pilai soka na basketbol, mekim pani

NEM: Keiken Elmale

KRISMAS: 24 (man)

ADRES: Pes Primary School, P.O.Box 36, Aitape, Sandaun Provins

SAVE LAIKIM: Mekim pani, pilai soka, harim musik na lukim TV

NEM: Franklyn Wamo

KRISMAS: 26 (meri)

ADRES: Pes Primary School, P.O.Box 36, Aitape, Sandaun Provins

SAVE LAIKIM: Mekim pani, go lotu, pilai soka, harim musik na lukim tv

NEM: Annie Mary Yuwei

KRISMAS: 20 (meri)

ADRES: Pes Primary school, P.O.Box 36, Aitape, Sandaun Provins

SAVE LAIKIM: Pilai soka, volibol, mekim pani, go lotu, harim musik na lukim tv

NEM: Amos Geyamme

KRISMAS: 23 (man)

ADRES: Guyata Elementary School, P.O.Box 386, Eriku, Morobe Provins

SAVE LAIKIM: Pilai soka, ritim buk na go lotu

Hevi long wok ples i kamap insait long femili

Dia Laipain,

MI GAT hevi wantaim man bilong mi. Em i save kros pait na tok nogutim mi na ol pikinini taim em i gat hevi long wokples na ol hauslain bilong em.

Em i save tromoim ol tok nogut olsem "f" wod na ol narapela toktok i no gutpela. Olgeta taim mi laik toktok long em na mipela i ken stretim ol samting long gutpela rot, em i save paia moa na traime long kilim mi. Taim mi toktok long ol man na ol hauslain bilong mi, em i save tromoim ol tok nogut long mi.

Mi slip tupela taim pinis long haus sik long ol bagarap man i bin paitim mi nogut na mi kisim. Em no laik bai mi givim mani long ol femili bilong mi. Em save mekim nogut long ol pikinini tu bikos taim em i no amamas long samting, em i save paitim ol nogut tru. Em i laikim bai ol pikinini i wokim samting olsem ol bikipela man na olsem, em i save mekim ol olsem ol bikipela manmeri.

Las long en, mi pilim olsem mi wanpela "sex object", mining olsem man i save yusim mi long amamasim em yet. Taim mitupela i stap wantaim, em save toktok tasol long "sex" o pasin bilong man na meri i slip wantaim. Taim em i paitim mi, bagarapim na tromoim ol toktok i no gutpela long mi, em save laik slip wantaim mi. Tasol bai mi slip wantaim dispela kain man i save wokim mi nogut, tasol pastaim em bin givim mi tripela naispela pikinini? Olgeta taim, mi save yesa long em tasol sapos ol samting i no go gut na mi les, em i save paitim mi nogut.

Bai mi stretim dispela hevi olsem wanem?

Yours in Need Friend.

Dia Pren

Mipela i sori long harim stori bilong yu. Em i samting bilong sori long en we ol man ol bin laikim na maritim i wokim wankain olsem yu i go long ol.

Yu tok yu gat tripela pikinini long em na yu no amamas long stap na marit laip bilong yu bikos man bilong yu i



save paitim yu na mekim nogut long yu. Em i save mekim nogut tu long ol pikinini bilong yutupela na em i save jeles long yu toktok long ol man pren na ol hauslain bilong yu.

Las long en, em i yusim yu long amamasim em yet. Em save laik slip wantaim yu bihain long yutupela i kros pait, tasol yu save larim em bikos yu pret long en i paitim yu.

Mipela i luksave olsem yu laik mekim samting long stretim wari na hevi bilong yu. Mipela i tok tenkyu long serim hevi bilong yu wantaim Laipain. Olsem mipela i tok pinis, planti ol narapela meri i stap long wankain situesen olsem yu bikos ol i pret.

Pren, yu save pinis olsem taim yu pasin maus i stap na no tokim wari bilong yu long narapela man, yu no kisim helpim. i gat ol rot yu ken kisim helpim tasol mipela i laik givim yu sampela tingting long yu i skelim long en.

Long marit, i gat sampela kwaliti o samting we ol patna i mas i gat long mekim femili i stap amamas. Ol dispela em laik pasin, tras, rispek o luksave long wanpela narapela, wokim tok tru na pas wantaim wanpela patna tasol. Long buk Baibel, dispela em ol kaikai bilong Spirit na i stap long Gale-sien 5: 22,23. Taim man i gat ol dispela kwaliti, bai amamas i stap na laip bilong en na femili i ron gut.

Pren, mipela i luksave long sindaun bilong yu, tasol yu glasim tu pat bilong yu long dispela marit laip bilong yu-pela? Em save kisim tupela long kamapim hevi. I moabeta yu glasim gut ol samting na luksave long hevi long sait bilong yu. Taim yu lukim long wanem hap yu no strong o asua bilong yu i stap na wanem hap strong bilong yu i stap long en bai yu painim rot long senisim pasin bilong yu. Na tu, bai yu luksave watpo man bilong yu i wokim olsem. Na yu ken givim em

ol gutpela stiatok long senisim ol nogut pasin bilong em.

Bai nogat wanpela gutpela samting i kamap sapos yu poinim pinga i go na i kam long man bilong yu. i mas gat wanpela patna long go pas na mekim samting long sevim marit we yupela i no stap amamas long en. Mipela i amamas olsem yu kirap na painim helpim long gutpela bilong marit na femili bilong yu.

Taim yu glasim pinis laip bilong yu, man bilong yu i mas kisim helpim long kamap gutpela man na papa n a senisim pasin bilong em long marit laip bilong yutupela na hevi yupela i stap long en. i moa gut sapos yu toktok long en long yutupela i go kisim kaunseling long hap we ol i gat kaunseling sevis long en, olsem senta bilong mipela. Tasol i gat ol narapela hap na tu, ol sios pasto yu ken toktok long ol long kisim helpim long ol.

Man bilong yu i mas save olsem em i rong long paitim yu na fosim yu long slip wantaim em. Dispela em i seksual abius na em i brukim lo bilong yumi. Aninit long mama lo, yu gat rait. Na ol pikinini bilong yu i mas gat gutpela lukaut long ol papamama. Sapos ol rot mipela i givim yu long en yu bihainim i no kamapim sampela senis, i moabeta yu go long NCD Welfea Opis o long Polis stesen long kisim moa helpim.

Sapos yu laikim moa helpim, i moabeta tu long man bilong yu i wokim apoinmen na em i ken ringim telepon namba 3260011 0 3405832. Gos i ken givim yu gutpela stia long mekim ol disisen.

Laipain.

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laipain

Politik lidasip bai strongim wok developmen long risoses: Somare

PAPUA Niugini Praim Minista Se Michael Somare i strongim tingting bilong ol investa long minarel na petroleum sekta olsem gavman bilong em i kamapim ol gutpela polisi long sapotim wok bilong ol.

Long taim em i opim kibung na givim toktok long Maining na Petroleum kibung long Sidni, Australia long Mande dispela wik Se Michael i tok wantaim gutpela kamap bilong dispela tupela sekta em i gat bikipela bilip long ikonomi bilong kantri.

Em i tok kantri i gat strong long daunim ol kain bel hevi i kamap long Bogenvil we bagarap i kamap long Panguna kopa main.

"Em i bin longpela taim, olsem foapela ten krismas i go pinis long taim mi go pas long Papua Niugini long kisim independens.


"Mipela i kisim taim nogut long hevi bilong Bogenvil.

"Em i wanpela kain taim em Bogenvil na olgeta kantri wantaim i no kisim gutpela sindaun yet bihain long dispela hevi.

"Wok i kamap yet long stretim dispela ol hevi.

Em i tok win mani long LNG projek bai daunim planti hevi i pas long sosel na ikonomi sekta long narapela 5-pela yia.

Long 2012 tripela o moa bikipela maining kampani



SOMARE: Bai strongim wok bisnis

kamap.

Namel long dispela em Marengo Maining \$US1 bilion (K3.3 bilion) wantaim Yandera

projek na Frieda Riva projek we Xstrata na Hailans Pasifik i go pas long em wantaim mani mak bilong \$US5.3 bilion (K17.5 bilion).

"Mipela inap long lukim opim bilong Bogenvil kopa main gen wantaim kos bilong moa long \$US4 bilion (K13.2 bilion), wantaim wok maining aninit long solwara aninit long namba wan taim long wol we Nautilus bilong Kanada bai go pas long em," Se Michael i tok.

Se Michael i tok ExxonMobil i wok long tokaut long gutpela kamap bilong \$US15 bilion (K49.5 bilion) PNG LNG projek na gavman i tok orait pinis long kamap bilong namba tu LNG projek we In-

terOil bai go pas long em.

"Eksploresen long wok bilong wel na ges i kamap strong na gavman i gat bilip olsem kantri bai salim moa wel na ges na dispela bai lukim tu salim bilong haidrokabon bilong mipela," Se Michael i tok.

Em i tok 2011 nesanel baset we gavman i tokaut long las mun bai helpim long strongim dispela ol wok, moa long gavman i givim sevis ol manmeri.

"Long 2012 lidasip baton bai go long nupela man.

"Mi pilim olsem ol plen gavman bai helpim gut kamap bilong maining na petroleum sekta na ol manmeri bilong Papua Niugini long bihain long taim," Se Michael i tok.

Fomel sekta gro long las 8-pela yia

I NOGAT wanpela taim long histori bilong kantri we em i gat gutpela taim long gro bilong ikonomi olsem em i gat long em tude.

Stat long taim bilong independens sindaun bilong kantri i no bin gutpela.

Tasol bihain long 2002 ol samting i wok long senis.

Long dispela taim i kam nau gavman i lukim fomel sekta i gro long 50 pesen wantaim planti ol wok.

Praim Minista Se Michael Somare i mekim dispela tok long PNG Maining na Petroleum kibung long Sidni, Australia long Mande dispela wik.

Hettok bilong dispela kibung em: Long Tem Developmen Strateji 2010 i go long 2030.

"Bihain long win long 2007 ileksen gavman bilong mi i pul gut moa long Australia long hevi bilong mani long wol long 2009.

"Long sampela kain mak, mi ken tok mipela i mekim gut bikos mipela i daunim mak bilong dinau mani bilong mipela i kamdaun, aninit long 30 pesen.

"Ikonmik gro i bin kamap gut tasol namba bilong ol wok i kamap isi isi.

"Tasol maski long dispela ikonomi gro long dispela yia bai gro long 7.1 pesen, dispela i namba wan mak PNG i bin kamap long taim em i kisim independens.

"Aninit long Baset bilong 2011 gro bilong ikonomi bai stap long 8 pesen.

"Ol plena bilong mipela i bilip mipela inap strongim 8.5 pesen enuel gro bilong mipela i go long ol arapela yia," Se Michael i tok.

Em i tok kain kamap bai mekim sindaun bilong ol manmeri bilong Papua Niugini i kamap gut.

"Ikonmik gro long ol yia i kam i bin kamap long olgeta sekta insait long 89 distrik.

"Dispela em bikos long mani gavman i putim bihainim Distrik Sevises Impruvmen Progrem (DSIP)."

Wantaim sosio-ikonmik plening, Praim Minista i tok gavman i wok long kamapim wantaim ol gutpela plen olsem Developmen Stratejik Plen 2010 i go long 2030 na Visen 2050.

Em i tok wantaim dispela ol plen gavman bai bihain long lukim ol manmeri i kisim gutpela sindaun.

"Win mani em gavman i kisim long maining na petroleum sekta bai helpim em long bungim ol askim bilong Milenum Developmen Gol (MDG)," Se Michael i tok.



SEKIM WOKMAN: Sekuriti supavaisa bilong Koporet Eksekutiv Gad, Steven Kramer, i redi long ron long motobaik long sekim ol gad bilong en long Mosbi. Foto: JAMES KILA Kila

Nupela sekyuriti kampani gat stail

James Kila i raitim

WANPELA lokal sekyuriti kampani long Mosbi siti i kamap wantaim gutpela stail bilong en long bringim sevis long ol klaints bilong en insait long Nesanel Kapitel Distrik.

Sekuriti supavaisa i save yusim liklik motobaik long ron i go kam long sekim ol wokman bilong en na tu sekim sapos ol wok i kamap gut long ol eria ol gad bilong en i wok i stap.

Nem bilong dispela nupela sekyuriti kampani long Mosbi em Corporate Executive Guards.

Corporate Executive Guards i gat 200 wokman. Opisal yunifom bilong dispela lain em blek na ol i save

werim yelo kep.

Dispela kampani i stap strong tu long helpim ol meri husat i bungim hevi long man bilong ol i paitim ol (Violence Against Women) na tu stetik gad long helpim ol klaints bilong en insait long Mosbi siti.

Operesen menesa bilong Corporate Executive Guards, Jimba Apisah i tok olsem kampani save mekim gutpela long ol wokman bilong em na tu save givim trening long sait bilong yusim redio, kastoma sevises na sekyuriti.

"Ol gads bilong mipela i no save yusim bus naip na diwai long paitim nating ol man. Mipela i save yusim pasin bilong toktok na stretim toktok wantaim ol man," Mista Apisah i tok.

Papa bilong dispela kampani Corporate Executive Guards em Steven Kilage.

Mista Kilage i givim seken sans long ol yuts husat i no gat wok.

Sekyuriti kampani bilong em i helpim sindaun bilong ol na tu kamap gutpela sitisen o man bilong PNG.

Wanpela gutpela samting tu long dispela kampani em olsem em save lukautim gut ol wokman bilong em long wanpela haus we 90-pela wokman i save stap long en.

Kampani yet i save baim pawa na wara bil bilong long haus slip.

Narapela gutpela samting tu em kampani i save givim kaikai long belo taim long ol wokman bilong em

Atoriti mas luksave long hevi bilong swit potete

Josephine Yaga (NARI) i raitim

HEVI bilong swit patete i no kamap gut long dispela taim i wok long kamap planti.

Long dispela as Nesenel Agrikalsa Risets Institut (NARI) i wok long painim rot long helpim ol manmeri bai ol i ken save long lukautim patete taim taim nogut i kamap.

Ol taim nogut olsem bikipela san, bikipela ren na kaikai bilong graun i pinis.

Wanpela bilong ol kain trening i kamap long 12 Mail, Huon Galp, Morobe Provins long las wik.

Dispela skul i kamap aninit long hettok "yusim

marasin na planim patete long strongim laip long Papua Niugini na Solomon Ailans."

Dispela projek em Australia Senta long Intanesenel Agrikalsural Risets (ACIAR) aninit long gavman bilong Australia na Senta bilong Intanesenel Patete, Peru i kamapim.

As tingting bilong dispela skul em long promotim swit patete na pos have menesmen wantaim gutpela save bilong lukautim patete.

Long dispela taim ol sumatin i luksave long wanem ol rop bilong patete i gat sik o binatang bilong sik na wanem i nogat.

Skul i kamap bilong ol i planim patete

long tripela mun.

Ol sumatin i lain long ol i no ken yusim fetelaia o pekpek bilong kakaruk o kau long redim graun na planim samting.

"Pasin bilong kisim ol kain samting bilong wok wantaim long planim patete i bikipela samting," Elick Guaf, NARI sinia agronomis i tok.

Ol swit patete i save gro long loulen na i save kisim moa long foa mun bipo long em i karim.

Planim ol patete we i klin wantaim save bilong gutpela rot bilong lukautim i ken lukim ol patete i gro hariap na karim gut.

NARI i kamapim 79 kain swit patete bilong loulen.

KISIM LUKSAVE: Ol sumatin kisim setifiket bihain long skul bilong ol. Dokta Pikah Kohun (long lephan tru) NARI Infomesen na Nolis Progrem dairekta na Elick Guaf (rait han olgeta) Sinia Agronomis, i givim aut ol setifiket. *Poto: JOSEPHINE YAGA*

KISIM SAVE: Ol sumatin (long lep han) Singis Ketti na Dulcie Fonny i kisim save long lukautim swit patete. *Poto: JOSEPHINE YAGA*



Salat em bus marasin long rurel ples

James Kila i raitim

INSAIT long Papua Niugini i gat planti kain kain lip bilong bus i stap we ol manmeri i save yusim olsem marasin long stopim kus, stretim skin pen na ol narapela sik long bodi.

Ol dispela lip bilong bus em ol tumbuna marasin bilong yumi.

Wanpela lip we i save stretim skin pen em salat. Mosong o ol nil bilong salat i ken kukim stret skin na rausim ol pen long masol.

Long planti rurel ples long kantri ol manmeri i save yusim lip bilong salat olsem marasin bilong stopim skin o masin long bodi i pen.

Long planti ples long kantri olsem long Hailans rijen, planti ol lain i save groim spesel salat arere long haus o long gaden bilong ol.

Ol i save yusim lip bilong dispela ol salat long paitim long skin long stopim ol pen long bodi bilong ol.

Las wik mi bin go wok raun long

Managalas Pleto long Afore LLG long Oro provins na i bin stap long wanpela distrik kibung o miting long Jorura viles. Planti komyuniti lida bilong ol ples insait long Managalas i bin go long dispela miting na ol i wokabout longwe rot tru na masol bilong ol i pen.

Olsem na taim dispela miting i go het, sampela lain bilong Jorura viles i go long bus na bringim ol salat lip i go putim long sait bilong miting ples.

Mi lukluk i stap na wantu tasol wan wan ol lain husat i sindaun long bung i go na kisim ol lip na stat long paitim skin bilong ol.

Wanpela man bilong Jorura viles i tok olsem taim man i sindaun longpela taim na baksait i pen o sapos ol i slip wan sait long nait na bodi i pen, ol i save yusim salat long paitim long skin long stopim pen.

Yes, salat em tumbuna marasin bilong yumi ol Papua Niugini stret.



SALAT MAN: Wanpela man bilong Jorura viles long Managalas long Oro provins i soim salat lip long stopim skin pen. *Poto: James Kila*

Ol kantri bung long toktok bilong wok agrikalsa

Senior Anzu (NARI) i raitim

WOK bilong kisim na serim ol toktok bilong agrikalsa bai wan wan kantri long ol samting ol bai mekim long groim kaikai.

Na dispela bai bihainim tingting bilong Fud na Agrikalsa Oganaisesen (FAO) bilong Yunaited Nesens.

Dispela wok, Bungim wantaim (Coherence) ol toktok bilong Agrikalsa Risets bilong Developmen (CIARD), em ol toktok manmeri i ken painim long intanet.

Dispela ol toktok i bilong kamapim gutpela menesmen long wok agrikalsa.

As tingting bilong kamapim (CIARD) em long lukim agrikalsa sekta moa long ol manmeri long ol i save long ol arapela kaikai na ol rot bilong kamapim na lukautim dispela ol kaikai.

Moa long 30 profesinel o save-manmeri long wok bilong infomesen na komyunikesen long 20 kantri long Esia Pasifik rijen, i kamap long dispela kibung long Bangkok, Thailand i no longtaim i go pinis.

Ol kantri i kamap bihainim tokaut bilong Esia-Pasifik Asosiesen bilong Agrikalsa Risets Institut (APAARI), wanpela rijinal grup.

APAARI i bin save promotim

wok bilong Infomesen Komyunikesen Teknologi o long narapela nem Infomesen Komyunikesen Menesmen (ICT/ICM) na dispela i go aninit gen long wok bilong Agrikalsa Risets bilong Developmen (AR4D). AR4D i gat progrem Esia-Pasifik Agrikalsa Risets Infomesen Sistem (APARIS).

APARIS progrem i wok klostu tu wantaim Global Forum bilong Agrikalsa Risets (GFAR) we i save stap long Rom, Itali na FAO.

Long save moa long dispela ol grup na progrem manmeri i ken lukim long dispela websait em www.ciard.net

Long serim ol tingting na toktok manmeri i ken go long dispela websait long putim toktok na tingting bilong ol i go insait.

Long Pasifik rijen bung i bin gat NARI (PNG), Ministri bilong Agrikalsa (Fiji) na Ministri bilong Agrikalsa na Piseris (Samoa).

Long tingting bilong APAARI, dispela woksop i mas helpim ol memba bilong NARS (Nesenel Agrikalsa Risets Sistem).

Long dispela ol memba bai save long ol nupela toktok na tingting bilong mekim wok agrikalsa na menesim gut wok bilong ol.

Ol bikipela toktok i kam aut long dispela kibung em:

- MEKIM luksave i go ICT/ICM i go bikipela na kamapim gutpela menesmen;
- PROMOTIM CIARD tingting, moa long kamapim ol gutpela menesa long wok bilong Nesenel Agrikalsa Infomesen Sistem (NAIS) long Esia-Pasifik rijen, na
- KAMAPIM ol wok bai strongim APARIS long ol i ken strongim gut wok bilong agrikalsa na sapatim laip bilong ol manmeri.

Woksop i stap long Tunde dispela wik na bai pinis long tude Fonde 17 Septemba, 2010.




RESISPilaia bilong Eastern Stars (lephan) i hariap long kikim bal i go bipo long fulbek bilong Besta i pasim em. *POTO: Andrew Molen.*



PAITIM: Bipo Australia pilaia, Brad Hogg i makim gut wanpela bal i kam long long ol Marlins long T20 Legend's kriket salens bilong ol las wik Sande long Mosbi. *POTO: Andrew Molen.*



TROMOI: Alice Kalas bilong Stingers i hariap long tromoi bal i go bek bihain long ol i paitim i kam long em long Mosbi sofbol gem bilong ol agensim Dolphins. Stingers i win 16-0. *POTO: Andrew Molen.*



LONGPELA LEK: Senta bilong Brian Bell i surukim lek bilong em i go longpela bai em i noken abrusim mak na kisim bal long Praivet kampani netbol resis bilong ol agensim BSP long Novemba 28. *POTO: Andrew Molen.*

Spots Dro

NCD Women's Off Season Rugby League

Raun 3 dro

Sarere Disemba, 11, 2010

Murray Bareks.

- 1000 Murray Barracks vs Toks Angelos
- 1100 Morata Crows vs MS United
- 1200 Wildlife Pythons vs Porebada DCA's
- 1300 Morata Kokofas vs J.V Bulldogs
- 1400 KI Titans vs 4 Mile Cats
- 1500 West Kongo vs Barbarian Sisters
- 1600 Backyard Sisters vs 6 Mile Dogs

TOKSAVE: Salim ol spots dro bilong yu kam long Feks; 325 2579, e-mel; amol@wantok.com.pg o kam lusim long Wantok Niuspepa opis long Central Waigani, NCD.

Samuel bai no nap giv ap



SANAP YET: Samuel i bilip trening long Australia bai nap mekim em i kamap wanpela nambawan paitman. POTO: Andrew Molen.

Andrew Molen i raitim

I NOGAT wanpela samting bai stopim Alfred Samuel long kamap wanpela nambawan kikboks long wol.

Em i tok em bai trening hat na pait strong yet inap em i kisim nem olsem nambawan pait man.

"Dispela em driman bilong mi na mi bai no nap givap, bai mi traim yet inap mi kamap," Samuel i tok dispela wik long Mosbi bihain long em i kam bek long wanpela pait bilong em long Australia las wik.

Em i bin go long namba wan K-1 kikboksing pait bilong em we em i pait aninit long Fite 108 klap bilong wol sempion kikboks, Tim Drury.

Samuel i bin lus taim em i kikim birua bilong em tasol lek bilong em yet i bagarap.

Bihain long dispela pait, Samuel i bin mekim namba wan boksing pait bilong em tu.

"Mi no save pait boksing bipo tasol dispela em i namba wan taim bilong mi na mi go insait na pait tasol," em i tok.

Em i lusim dispela pait tu long poin tasol dispela i no laspela taim bilong Samuel long pait.

"Mi bai kam bek yet na mi no inap malolo," em i tok.

Samuel i bilip olsem long kamap wanpela gutpela paitman, em i mas save long kain kain stail pait bai em i ken save long trening na pait bilong ol arapela bai em i ken kisim ol gut taim em i bungim ol.

Bihain long pait em i bin stap liklik wantaim Drury na trening we em i painim olsem i strongpela moa long trening em i save kisim long PNG.

"Dispela kain trening em i hat moa yet tasol i gutpela long redim gut long pait na mi laikim," em i tok.

Taim em i stap wantaim Drury tu, Samuel i luksave long Muay Thai na Miks Masol Ats (Mixed Martial Arts) o MMA bilong wanem klap bilong Drury i save givim dispela kain trening tu.

"Mi lukim na mi laikim olsem na mi laik lainim na pait insait long dispela tu," em i tok.

Nau yet Papua Niugini gat wanpela Muay Thai na MMA paitman.

Lee Garap em wanpela Muay Thai paitman tasol na MMA em Adrian Peng.

Sapos Samuel i lainim na pait Muay Thai na MMA, em bai kamap namba tu paitman bilong PNG long traim dispela tupela strongpela spot.

Drury i tok em i amamas long pasin na strongpela tingting bilong Samuel na bai wokbung wantaim em long mekim em i kamap wanpela gutpela paitman.

"Em i gutpela man bilong trening strong na i gat gutpela pasin bilong em na mi na famili bilong mi amamas long em i kam stap wantaim mipela taim em i kam trening na wetim pait bilong me," Drury i tok.

Samuel bai go bek long Jenuari, 2011 we em bai stap trening na pait long Australia wantaim Drury inap tupela yia.

Em i tok dispela em i sans bilong em long luksave long driman na bilip bilong em na i amamas long olgeta husat i helpim em i kamap olsem.

"Mi amamas tasol long karim nem bilong kantri na nupela Jiwaka provins bilong mi long ovasis na wanem hap mi raun na pait long en," Samuel i tok.

Jack na Fa'arodo stap long gutpela fom

i kam long pes 28

Kosa, Tommy Mana i tok strong bilong gem bilong ol i stap long atek na kain ol pilaia olsem dispela tupela man i save go pas long kain gem.

Jack, bilong Sentrol provins long PNG em wanpela kain pilaia we i save wetim tasol gutpela bal i kam long em na i no save westim taim long kikim i go insait long gol.

Fa'arodo, bilong Solomon Ailan, i wankain olsem Jack tasol em i gutpela tu long pulim bal i go i kam na painim rot namel long difens sapos banis bilong narapela tim i sanap strong.

Em i ken kikim bal i go raunim banis na go insait long gol tu.

Tasol kain ol pilaia olsem Jack an Fa'arodo i no inap long kisim ol gutpela bal sapos o nogat ol arapela long helpim ol olsem kepten na midfilda, David Muta na Andrew Lepani.

Muta, Lepani na tupela fowet, Koriak Upaiga na Eric Komeng tu i stap long gutpela fom na sapot ol i givim long Jack na Fa'arodo em i wanpela samting we i strongim tim na i kisim ol i kamap long dispela mak nau.

Al Wahda em i sempion tim bilong Dubai yet na bai kisim ol Hekari long asples bilong em.

Mana i tok em i amamas long pilai bilong tim bilong em las wik Sande we i soim gutpela mak bilong ol.

Em i bin yusim dispela gem tu long kolim tingting bilong ol pilaia bai ol i noken pilim nogut tumas taim ol i go insait long bikpela gem bilong agensim ol arapela kantri.

Em bai no inap isi bilong ol Hekari bilong wanem ol bai pilai wantaim sampela ol nambawan pilaia bilong ol ara-

pela kantri long wol we soka em i bikpela pilai bilong ol.

Tasol Hekari karim nem na sapot bilong PNG na olgeta Pasifik kantri wantaim na tu i gat ol pilaia bilong olgeta hap long Pasifik i stap insait long tim.

Em i stap nau long ol pilaia olsem Jack na Fa'arodo long strongim gem bilong Hekari wantaim gutpela sapot bilong Muta, Lepani, Upaiga na Komeng.

Dispela ol pilaia i stap insait long planti bikpela tonamen tasol em i namba wan taim bilong ol long bungim ol arapela sempion bilong wol na wanem risal ol i kisim i ken skulim ol planti moa samting long soka.

Fact File:

Hekari tim em;

1. Simone TAMANISAU (GK);
2. Gideon OMOKIRIO;
6. Abraham INIGA;
10. Osea VAKATALESAU;
12. David MUTA;
16. Pita BOLATOAGA;
17. Kema JACK (c);
19. Koriak UPAIGA;
21. Malakai TIWA;
25. Alvin SINGH;
28. Henry FA'ARODO

Risev;

4. Trevor IRE;
7. Benjamin MELA;
9. Tuimasi MANUCA;

11. Joachim WAROI;
13. Andrew LEPANI;
14. Niel HANS;
15. Samuel KINI;
18. Eric KOMENG;
20. Gure GABINA (GK);
22. David AUA (GK);
23. Ian YANUM;
27. Rex HONU





bemobile is bringing your home province closer to you

Text your region to 1999 for your daily updates

PLUS, go into the draw to win an HTC Diamond 2 & 200 mins talk time, bemobile to bemobile only

- for Momase - MOM
- for New Guinea Islands - NGI
- for Highlands - HIG
- for Southern - SOU



bemobile mipela bilong yu

cost of SMS 0.89t

Terms and Conditions apply

Gavman no givim mani bilong Pasifik Gems yet

14 MUN i go pinis bihain long Papua Niugini winim tok orait long holim 2015 Pasifik Gems long hap tasol nau yet i nogat wanpela wok i kamap.

Eksekutiv Dairekta bilong PNG Sports Foundation, Iammo Launa i tok long wanpela pas bilong em i go long spots minista, James Marape olsem, as bilong dispela em bilong wanem Gavman i no givim wanpela mani bilong dispela ol wok yet.

Tripela bikpela wok we wanpela kantri mas mekim long redi bilong Pasifiki gems em;

Komiti bilong redim long pilai graun na ol samting bilong pilai

(VIEC) mas i gat mani bilong mekim dispela wok. Ol i mas wokim na redim ples we ol pilaia na ofisol bilong ol kantri bai kam silip long en long taim bilong pilai tu.

Ogenaisim komiti bilong Gem i mas gat mani bilong kisim ol man-meri long wok bilong en long redim ol samting na tu long lukautim na ronim gem taim em i kamap; na

PNGSFOC mas i gat inap mani bilong statim: Grassroots to Gold" progrem bilong en long luksave long ol nupela gutpela pilaia na redim ol long pilai gut na apim mak bilong PNG long 11 ples we ol i kisim long laspela MiniPasifik

Gems long Cook Ailan.

"Dispela em ol bikpela wok na i save gat planti yia long mekim na pinisim," Launa i tok.

Em i askim Minista Marape long sekim na tokaut long wanem taim Gavman bai redim dispela ol mani, hamas ol bai givim long ol wok long 2011 na wanem rot bai ol i bihainim long rausim dispela mani o husat bai ol i givim i go long en.

PNG gat tingting long kamapim wanpela nupela pilai graun we dispela Pasifik Gems bai kamap long en tasol nau yet i nogat wanpela pos i sanap yet na ol wok long planti arapela samting tu i no kamap yet.



WETIM YET: Launa i askim Gavman long tokaut wanem taim ol bai givim ani bilong 2015 Pasifik Gems. POTO: Andrew Molen.

Maroons laik pasim Blues long Morata Orijin

MORATA wan (1) Maroons i winim pinis namba wan stet ov orijin gem bilong Morata of-sisen ragbi lig na nau ol i laik pasim dua long ol Morata tu (2) Blues dispela Sande long Kone Tigers pilai graun long Mosbi.

Ol Maroons i laik winim bek taitol we ol i bin holim long 2008 na 2009 tasol i no luk olsem dispela win bai kam isi long ol bilong wanem ol Blues tu i pait strong tru.

Long namba wan gem ol i lus long tupela poin tasol wantaim 12-10 skoa.

Dispela Sande bai ol i stretim wari bilong ol long lukim sapos ol Maroons bai nap long sanap antap gen o ol Blues bai strong inap long kam bek na winim long gat sans long laspela gem bihain long tupela wik.

Bipo long dispela bikpela gem long Sande tu bai gat wanpela pilai bilong ol olupela pilaia o ol Golden Oldies.

Astingting bilong gem bilong ol em long tingim bek bipo taim ol i save pilai na tu amamasim ol olupela sapota husat i save lukluk long ol i pilai bipo.

Morata lig i ron inap 31 yia nau na planti ol biknem pilaia tu i bin kam aut long dispela ragbi lig resis long ol yia i go.



KAM BEK: Carlaw bai stat trening wantaim Broncos bipo long krismas long redi long 2011 sisen.

Carlaw bai kam bek long Broncos

DANE Carlaw bai kam bek long Nesenel Ragbi Lig (NRL) long Australia long pilai wantaim ol Brisbane Broncos gen.

Em i sainim kontrak bilong pilai wanpela yia na bai stat long

2011 sisen.

Carlaw, 29 krismas, i stap nau long Inglen we em i pilai tripela yia olgeta wantaim Catalan Dragons long Supa Lig tasol i kisim tok orait long klap long go bek long ples

bilong em.

Em i bin winim tupela primiasip taitol wantaim ol Broncos long 2000 na 2006 na i pilai 6-pela tes bilong Australia na 13 Stet of Orijin bilong Kwinnslen.

SPOT RAUN

WANTAIM

Scott Vavine, ML

**Spots na HIV/AIDS**

NAU sik HIV/AIDS i kamap wanpela bikpela hevi we planti wok na toktok i save kamap long en long olgeta hap bilong komyuniti, olsem na spots long PNG tu i mas mekim sampela wok long lukluk long en.

Planti manmeri long PNG nau i harim na save long ol hevi bilong dispela sik na wanem kain samting olgeta i mas mekim long abrusim.

Olsem yu save pinis, dispela sik i nogat marasin bilong en na i nogat wanpela samting bai nap long pinisim sapos yu kisim.

Dispela hevi go bikpela moa long sampela ol arapela wok developmen tasol wanpela askim yumi ken givim em, wanem samting bai spots i nap mekim long helpim na daunim dispela hevi?

Em i wanpela strongpela askim we wanwan spots manmeri mas askim.

Tasol bekim na toktok bilong dispela em i stap ples klia na mi bilip olgeta spots manmeri long komyuniti save long dispela.

Olgeta manmeri, liklik i go bikpela, i save pinis olsem dispela sik bai kilim yu.

I gat ol rekot i stap we i soim planti manmeri husat i dai pinis long dispela sik.

Namba bilong ol manmeri gat sik AIDS long Pasifik em i antap tru, PNG i go pas long dispela namba insait long Pasifik na i stap namba 4 ples insait long Asia rijen.

Bai yu pret tasol long lukim namba bilong hamas manmeri gat dispela sik pinis.

Long pinis bilong yia 2009, inap long 34, 000 manmeri kisim dispela sik na inap long nau, dispela namba i wok long go antap i stap.

Ating dispela namba i mas go antap tu o tripela taim moa pinis bilong wanem pasin bilong ol manmeri no senis yet.

Yumi go bek gen long askim bilong yumi; "Spots i ken mekim wanem long daunim dispela hevi?"

Olgeta spots lida insait long kantri long olgeta level i gat wok long mekim long daunim dispela sik nogut.

Yumi mas senisim ol pasin bilong yumi bai yumi ken lukim ol gutpela samting i kamap.

Spots i gat pawa long pulim planti manmeri kam bung wantaim olsem na ol i ken kisim toksave na skul long sik AIDS long dispela taim.

Dispela wok i mas kamap olgeta taim long ol komyuniti spots bung.

Wanpela samting we i no gutpela em, ol manmeri no save bihainim wanem samting ol i lainim long dispela ol toktok na aweanes ol i kisim.

Ol manmeri mas kisim dispela toktok na aweanes olgeta taim bai ol i mas lainim long bihainim ol toktok na skul ol i kisim na i noken harim tasol na lus tingting.

Tasol mi tingting namba wan samting long tokim em long ol i mas strong na i noken go silip wantaim planti kain kain man o meri.

Olsem mi tok pinis, olgeta komyuniti spots lida i mas go pas long kamapim ol wok aweanes long dispela hevi na lukim olsem olgeta komyuniti grup insait long komyuniti bilong ol i mas stap insait long dispela ol aweanes.

Spots i gat planti helpim long givim i go long komyuniti developmen na tu developmen bilong pasin na tingting bilong wanwan manmeri na dispela kain hevi bilong sik AIDS em i wanpela samting we i ken bagarap developmen bilong komyuniti olsem na spots i gat wok long helpim na stretim tu.

Yumi olgeta i mas wokim samting nau long daunim dispela hevi na yumi noken sindaun nating na lukluk na ting em yet bai pinis bihain taim.

KISIM: Joyce (lephan) i givim sek long Sapias long soim nupela sponsasip SP Brewery i givim long PNGRFU. FOTO: Andrew Molen.

**PNGRFU lukluk long sevens****Andrew Molen i raitim**

PAPUA Niugini Ragbi Futbol Union (PNGRFU) na bai lukluk moa long ragbi sevens bilong wanem ol i bilip, kantri gat moa sans long kisim moa luksave long dispela spot.

"Yumi gat planti gutpela sevens pilaia olsem na mipela i laik lukluk long developim dispela hap gem bilong yumi pastaim," PNGRFU Presiden, Richard Sapias i tok.

Em i tok tu olsem ragbi sevens nau i kamap wanpela spot we ol bai pilai insait long Olimpiks olsem na PNG i laik gat sans long salim tim i go long dispela bikpela gem tu.

"Ragbi sevens bai kamap long Olimpik gem long 2016 long Brazil na PNG, yumi laik salim wanpela

tim i go long dispela tu," Sapias i tok.

Em i tok ol i soim pinis gutpela pilai dispela yia long Darwin sevens long Australia na tu ol i winim boul trofi agensim Canada long Komonwelt Gems long Delhi, India dispela yia.

"Ol mangi winim Canada we i wanpela kantri we ragbi kamap strong pinis, olsem na em i gutpela stat bilong yumi," Sapias i tok.

Em i amamas tu long wok bilong kosa, Shane Howarth husat i givim bikpela helpim long tim.

Tasol bikpela moa helpim bilong PNGRFU i kam long SP Brewery husat i kamap olsem mama sponsa bilong ol taim o i sainim wanpela tok orait dispela wik long Mosbi.

SP Brewery i givim K250, 000

long helpim PNGRFU ronim ol wok bilong en long kamapim na ronim gut ol ragbi sevens na arapela progrem bilong ol insait long kantri.

"Mipela i amamas long gutpela wok na pilai bilong ragbi sevens tim bilong PNG na mipela i laik sapatim wok bilong PNGRFU long kamapim na ronim gut moa dispela spot long PNG," Jenerel Menesa bilong SP Brewery, Stan Joyce i tok.

Em i givim K35, 000 long PNGRFU long ronim Nesanel sevens tonamen bilong ol long Kokopo dispela wiken olsem namba wan hap bilong dispela sponsasip.

"Mipela i amamas long ragbi sevens na mi laik lukim dispela ol lain i kisim PNG go olgeta hap long wol," Joyce i tok.

Gigira win namba wan taim**Bustin Anzu i raitim**

STRAIKA Bruce Kusanan na namba wan gol kipa, Danny Kali i putim bek sampela laip i go insait Gigira Laitebo Morobe FC long kisim ol i go insait long top 4 ples long Nesanel Soka Lig (NSL) bihain long ol i winim Besta United FC, 3-2 las wik Sarere long Lae.

Long dispela Raun 5 pilai long Se Ignatius Kilage stadium, Kusanan i bin kisim gutpela helpim long kepten, Goroba Tawa na narapela wan straika, Pascal Worjen long putim dispela tupela gol insait long namba wan hap bilong gem.

Long ol narapela pilai long hap, asples, NBS Tukoko Yunivesiti holim pasim nek bilong Madang Fox 2-0.

Dispela tupela gol i kam long namba tu hap bilong pilai, we Travis Kwa na Wesley Nate i putim long bringim ol sumatin i go klostu na stap insait long NSL poin leda.

Gol kipa, Kali tu i bin helpim tim bilong em na stopim planti ol gutpela gol we i bin kam long ol Besta United straika.

Em i putim bodi bilong em namel long

tupela gol pos na rausim planti bal.

Tasol ol yangpela mangi soim tru kala bilong ol taim straika na bebi Gigira, Dabinyaba, mid filda Emmanuel Simon, Vanya Malagain na Michael Keith i go pas long dispela.

Ol yangpela mangi soim olsem ol bai wanpela tim long winim taim ol i skoa 5 minit insait long namba wan hap na paulim tru Gigira.

Ol pas bilong ol, hetim bal na kik i namba wan tru.

Maski ol i kam bek long Mosbi, bihain tasol long pilai wantaim Hekari United insait long tupela de i go pinis, na lus 2-4, bodi bilong ol i no les long wokim ol dispela kain stail.

Long wanpela penolti, taim wanpela Gigira i holim bal insait long bokis na Max Sengam i mekim nois long umben bilong Gigira na ol i go pas 1-0.

Tasol i no long taim, Gigira i kam bek long bekim dispela gol bilong ol mangi taim Kusanan i skoa.

Dispela em bihain long kepten Tawa i pusim bal i go pas na Kusanan i bihainim i go na kik i go insait long umben bilong ol United.

Kusanan i wokim wan kain gen bihain long em kisim wanpela pas long Worjen na pusim i go.

Taim em i lukim olsem olgeta difenda i kam antap na planti spes i stap nating, em i pusim bal i go pas long umben long go pas 2-1.

Besta i kirap gen na i no wari long ol bikpela brata bilong ol.

Long wanpela penolti long kona, Malagain i kisim na katim long gol mak bilong Gigira we ol mangi bilong em i pulap.

Dispela kik i luk olsem em i go olgeta long narapela sait bilong bokis tasol Tweedy Inia i salim i go insait gen we Keith i sanap.

Keith i hetim i go insait long umben taim Kali no was long em na skoa i sanap 2-2.

Dispela gol bilong Keith i givim ol sinia mangi het pen na Besta i putim presas long Gigira na laik putim narapela gol gen.

Tasol Afrika bilong Morobe, Worjen i gat narapela stori bilong wokim taim em i giamanim tupela difenda bilong Besta na slekim bal i go insait long go pas gen na win wantaim 3-2 skoa lain.



Jack na Fa'arodo stap long gutpela fom

Ol bai strongim tim long skoa

Andrew Molen i raitim

ASTE nait (Trinde), Hekari United i pilaim namba wan gem bilong ol long Klap wol kap resis bilong soka long Dubai agensim Al Wahda.

Tim i winim wanpela trail gem bilong ol las wik Sande we ol i kamapim long tesim ol pilaia bilong ol na redim ol long tonamen dispela wik.

Dispela gem i soim gutpela piksa long ol we i lukim tupela biknem pilaia bilong ol, Kema Jack na Henry Fa'arodo i stap long gutpela fom.

Jack i putim wanpela gol long 2-0 win bilong ol agen-

sim ami tim bilong Qatar (Kata) las wik Sande na Fa'arodo tu i kamapim wanpela strongpela gem we i strongim tim long fran.

Sampela toktok i kamap olsem Jack i no pilai strong tumas long stat bilong NSL resis dispela sisen tasol em i soim kala bilong em nau long dispela bikpela tonamen na i ken strong tim gen.

Fa'arodo i karim strongpela pilai bilong em we ol wanpilai bilong em long tim tu i save bel kirap long lukim.

"Henry em i gat planti ekspiriens na mipela i save amamas long pilai wantaim em.

"Em i gat planti stail bilong pilai na sampela taim em i save paolim mipela tu long training," kepten, David Muta i tok bipo long ol i go long Dubai.

Em i bin tok tu olsem Jack na Fa'arodo i save kamapim strongpela gem bilong ol fran bilong tim na i gutpela long tupela i

stap long gutpela mak taim ol i go long dispela tonamen.

Kosa, Tommy Mana i tok strong bilong gem bilong ol i stap long atek na kain ol pilaia olsem dispela tupela man i save go pas long kain gem.

Jack, bilong Sentrol provins long PNG em wanpela kain pilaia we i save wetim tasol gutpela bal i kam long em na i no save westim taim long kikim i go insait long gol.

Moa long Pes 25.



POTO: ANDREW MOLEN.

25 Samuel no inap givap long pait

26 Carlaw bai kam bek long Broncos long 2011 sisen.


27 PNGRFU lukluk long sevens. SP sponsa.

NISSAN URVAN

DRAIVIM IGO tasol long **K69,900**



- 3.0 Lita Diesel Engine
- 5 Spid Manual Transmisen
- Moa Pasindia Hetrum
- Redieta stap wan mita bihain long frant bampa



*Piksa bilong edvetismen tasol.

BOROKO MOTORS

PORT MORESBY
LAE
MT HAGEN
TABUBIL

PH: 325 5255
PH: 472 1144
PH: 542 1933
PH: 649 9048

KIMBE
MADANG
RABAUL
Website: www.boroko-motors.com

MP105878a